

DIMPHO TŠA MODIMO KA MEHLA

DI HWETŠA MAFELO A TŠONA

 Ke a go leboga, Ngwanešu Neville. [Ngwanešu Neville o re, “Modimo a go šegofatše, ngwanešu.”—Mor.] Morena a go šegofatše, ngwanešu.

Mantšboa, bagwera. Ke sa tšwa go tsena ka gare, lebakana la go feta, gomme ke naganne nka kgona go tla tlase le go le kganyogela bohole “Krisemose ya Lethabo.”

² Gomme ka fao ke be ke sa tsebe gore ke tla ba le monyetla wo mobotse go bolela le lena ka Lentšu la Morena. Gomme kafao Ngwanešu Neville o mpotšišitše, gomme ke bile le dihlogo tše mmalwa tše nnyane tša Krisemose tšeō ke bego ke di šomiša, e tee ya tšona godimo ka—ka Phoenix le tlase ka Tucson, mafelo a go fapania tikologong kua, molaetša wa mehleng wa Krisemose. Gomme ke naganne, bošegong bjo, ke tla no bolela ka se sengwe se sennyane fa seo Morena a se beilego godimo ga monagano wa ka go se kgale, ge ke be ke le godimo ka Colorado.

³ Gomme ke be ke nagana ka se sengwe nakong ya Krisemose, gomme ke na le e ka ba tše tlhano goba tše tshela tša dingwalwana tše nnyane di ngwadilwe fase mo, Mangwalo le dilo. Mo...ga ke...ke a thankia Ngwanešu Neville le badiredi bohole ba dira seo. O...go bonala e ke se sengwe se tla go wena, gomme o se ngwala fase. O leta lebakana, gomme o se bea fase. Ke e beile godimo ga papetlana ya pampiri, feela godimo ga papetlana ya pampiri. Ka gona ge ke biditše nako ye nngwe, ke tla lebelela morago go kgabola mo le go re, “E be e le eng bjale se ke se swerego?” Yeo ke tsela, ge re bitšwa ka pela ka kgonthe, le a tseba.

⁴ Go be go le, ke...ge ke be ke sa le yo moswa, nka no...monagano wa ka o be o le bjalo, nka no nagana se gonabjale, gomme ke be ke se ka swanelia go leta, ke a nagana “Matšatši a lesome a go feta ke be ke le le le itšego, lefelo le le itšego. Seo ke sehlogo. Sona sese, gomme sese se a ya.”

⁵ Le a tseba, ge e sa le ke feta diphetogokgolo di se kae, Ngwanešu Higginbotham, gomme ke putlike dinoka di se kae, gore go no se sa tla ka tsela yela, go ya kgojana gannyane godimo ga tsela. Eupša e...bjalo ka ge Ngwanešu Neville a boletše, nakwana ya go feta, “Re tla kgauswana, kgauswana Gae.”

⁶ Ke mo go botse go ba morago gae. Nna, go tleng morago, gobaneng, lehlwa la go šiiša. Gomme go ne...le go kwa ka ga dikotsi le dilo, bontši kudu bja tšona mo tseleng, gomme batho ba bolawa. Gomme e no nagana ke makgolo a makae ba tla

lahlegelwago ke bophelo bja bona bjale, gare ga bošegong bjo le morago ga bja Ngwaga wo Moswa, ke Maamerika a makae ba tla hwago! Gomme le a tseba, ba bangwe ba rena re ka no ba thwi fa, bošegong bjo. Gomme go no ya le gore bjale, seo... boemo bja rena pele ga Modimo. Ke setšhaba sa manyami, ngwanešu yo o boletše, manyami mogohle. Gomme folaga ya rena e be e lekeletše, matšatši a masometharo, seripagare, tšohle ka baka la sebe le batho ba ba ka se amogelego tsela ya Modimo ya—ya—ya dilo.

⁷ Le ge re ka kgora go se dumelane le motho, ge re sa kgone go e dira ka tsela ya boena, gomme ka gona... Le a bona, ge Kriste a le ka pelong, gona ga go kgathale o ganana gakaakang le monna, o sa na le lerato go yena le tlhompho. Ke ganana le banna ba bantši, makga a mantši. Eupša go le bjalo, ga se ešo ka ke ka bona o tee ke fapanego le yena yoo nkilego ka gopola ka ga gagwe gape go feta “go bea letsogo la ka go mo dikologa le go mmitša ‘ngwanešu wa ka,’ ka leka go mo thuša bokaonekaone nka kgonago.” Ke ganetšana le yena gobane gore ke nagana mohlomongwe gore go ganetšaneng gore o... Se a se dumelago, gore nka no se dumele go no swana le yena, eupša... le go ya pele, eupša bjale nka leka go tšweletša tsela ya ka go yena ge a tšweletša ya gagwe go nna, le go ba tliša mmogo le go šoga le go bona se re nago nabo, eupša go se dumelane ka mokgwa woo. Feela bokgole bjo e tlago go... ga ra swanela go tsoge re befetšwe goba go nyaka go gobatša, goba go senya goba eng kapa eng. Re swanetše ka mehla go leka go aga godimo.

⁸ Re na le tlhaselo ya go tonya e kgatlampana mo, a ga re nayo? Masomešupa pedi ge ke tloga Tucson, gomme ge letšatši le ile tlase le go ba leswiswi, e be e sa le masometshela senyane. Kafao, gona go tla morago godimo fa, ke no ba le go thothomela gohle, le a tseba. Ke... Tsela yela yohle ya lehlwa, le ka tlase ga lefeela, le aese le se sengwe le se sengwe, ke be ke swanetše go e tlwaela gape. Go a tlaba ka fao o ka bago go “tlwaelafelo” kudu ka tse—tse tsela ye nnyane bjalo. Gomme ge e sa le ke le tlogela, ga se ka ba le sebaka go hwetša go phela. Ke hweditše... boka saenase ka go bo—bo boso ka fa, gomme ge ke tšofala... Gomme ke belegwe le go godišetšwa fa. Eupša ge, le a bona, ge o le yo moswa, o na le se sengwe, o ka kgona go lahla; eupša ge o tšofala, gobaneng, o thoma go hwetša gore se sengwe ga se gona. Go be go fela, o ka no lebala ka yona. Wena... go na le se sengwe fale seo—seo se no se lahlego boka se dirile ge o be o sa le segotlane, kafao ke hwetša ka tsela yeo gore ke... klaemete yela ya borutho, bakeng sa mokgalabje, mohuta wa go thuša gannyane nthatana.

⁹ Ke elelwa ke etla tlase Utica Pike godimo kua, bjalo ka segotlane (šupa, seswai, lesome, lesomepedi, lesomenne la mengwaga bogolo), ke sa rwala dieta (dieta tša thenese) gomme yona seswai goba lesome ka tlase ga lefeela, le dieta tša thenese, menwana ka ntle ga tšona. Gomme e sego... bjale seo ga se go

sepela tlase boka mokgotha fa, eupša go phatlola lehlwa. Ga go difatanaga di tlogo tlase, go ka no ba le mohlala wa karikana gatee mo nakwaneng. Go tleng tlase tselalephefong yela mo mosong, ke apere jase ye nnyane ya kgale, go se hempe, gomme e konopetšwa ka mokgwa *wo*, e sego bontši go feta se ke se aperego gonabjale; ke kolobile thapa go fihla matolong a ka, ke eya pele ka gare gomme ke sa e fe šedi. Le a bona, ke sa be le go kgohlola. Eupša yeo e bile e ka ba mengwaga ye masomenne tlhano ya go feta. Kafao, bontši ka moka bja go fokola, ke ile dimaele tše ntši le go aga godimo go seelalebelo, le a tseba, kafao re no se e tšee boka re be re fela.

¹⁰ Ke bone Ngwanešu Capps a phagamišetša hlogo ya gagwe godimo. O yo moswa kudu go nagana tšona dikgopololo bjale. Gomme kafao letang go fihla le fihla godimo moo Ngwanešu Neville le nna re lego, gona—gona le tla—le tla nagana dilo tše dintši go fapano, mohuta wa go fokola.

¹¹ Gabotse, re bile le dinako tše kgolo ka go Morena. Morena o re šegofaditše gagolo, gomme ke leboga kudu. Gomme ke tla morago, ke a nagana, Lamorena la go latela, Morena ge a rata, ke nyaka, ge Ngwanešu Neville a sa tshwenyege, mo... Ke na le tirelo, bonnyane Lamorena mosong gomme mohlomongwe Lamorena bošego, tirelo ya phodišo bakeng sa Lamorena bošego. Lamorena mosong ke na le molaetša wo bohlokwa, ge Morena a rata gore ke o fegolle. Ga se ke nagane ka sehlogo sa ka... e sego feela go feta sehlogo sa ka golebjale, ga go kgwekgwe ya sona, gobane ke—ke... e sego ntle le—ntle le e ka ba efe, le a tseba, kutollo go tšwa go Morena, eupša feela ka go nnamong. Ke—ke nyaka go hlagiša se sengwe Lamorena seo ke holofelago se tla ba mohuta wa go thušana gannyane go bapa ditsela tše.

¹² Ke swanetše go ya bjale ka tšhemong, gomme ke na le feela letšatši le lengwe le le lengwe le nyakile le tšerwe mo gohle. Ke a nagana Billy o be a mpotša, magareng ga lenaneopeakanyo, gore ke na le matšatši a mabedi goba a mararo ao nka kgonago go tla gae ka Aporele morago ga ge ke tlogile mo, go ya morago Tucson, gomme seo se kgauswi le go e rumo gona. Gomme ka gona go ya pele go fihla Nofemere ye e latelago, Oktobere, ge ke eya morago go lehlakore le gape go tšwa mošwamawatle.

¹³ Bjale, matšatši a mabedi gape go fihla Krisemose. Letšatši le lengwe gape, a ga se lona? Yeo e tla ba a mabedi. Mošupologo... Labobedi ke Thapama ya Krisemose? Labobedi ke Thapama ya Krisemose. A ga go makatše go bona gore maikhutšo a magolo a, ao re a batamelago, a batamelwa ka tsela ye a batamelwago ka yona? Ke selo sa go šokiša kudu, se—se—se selo sa go hlaganelo, go nagana gore—gore mebutla le—nonwane e bitšwago “Kriss Kringle” (Santa Claus) le se sengwe le se sengwe, e tšere boleng bja kgonthe go tloga go se Krisemose e lego.

¹⁴ Bjale, ga re...ga—ga re tsebe, gomme ka kgonthe ga ke dumele...Ke be ke sa no tla tlase, mosadimogatša wa ka o morago kua, gomme ke...go theoga tsela, ke be ke theeditše moithutadinaledi; gore bjale, ba nno wela godimo ga kgopolo yeo moithutadinaledi a mpoditšego ye mentši, mengwaga ye mentši ya go feta, ge ke be ke sa no ba mohlapetši wa diphoofolo mo ka Indiana. Ge ba mpoditše gore...ka fao dinaledi tšela di tlilego mmogo, feela boka moithutadinaledi yola wa mathomo a dire gomme tšela di bopile, se ba rilego e tla ba selo sa tlhago seo se diregago ye mengwe le ye mengwe, ke a dumela o boletše bošegong bjo, mengwaga ye makgolo seswai, goba se sengwe boka seo. Gomme e impshafaditše ka boyona gape, ka: Sargase le Jupitere, gomme ke a lebala; gomme Mart-...Mars; aowa, ke...yeo ke phošo. Ke tše dingwe tša dinaledi ka fao di kitimago lebelo ge di kgabaganya diobiti tša tšona mo mothalong wa lefase, gomme moithutadinaledi yo bošegong bjo o be a leka go bolela gore gabotse e be e le selo sa tlhago. Ga—ga ke—ga ke amogelete yeo. Ke a dumela e be e le selo sa kagodimogatlhago, se Modimo a se dirilego. Yena, dilo ke tša kagodimogatlhago le Modimo. Yena ke wa Kagodimogatlhago.

¹⁵ Gomme—gomme ke lebeletše tlase le go tseba gore se se lebane morago bjale le Aporele, Ke na le...Morena ge a rata gore nna ke phele botelele bjoo, ke tla ba masometlhano tlhano a mengwaga ka bokgale. Le a bona? Gomme ke—ke tseba...Eupša go lebelela morago go bophelo bja ka, gomme ke makala moo e diregilego. Go tšwa go tšona tša mathomo tše nnyane Dikrisemose, ge re lekeletše dikouse tša rena, gomme Mama o tla hwetša...Go molaleng re be re tla hwetša namune, le tše pedi goba tše tharo diripana tše nnyane tša dipongpong tša merapapitsi, gomme yeo e be e le Krisemose ye kgolo go rena. Eupša, le a tseba, digotlane ba—ba letetše tšona dimpho. Re—re hwetša gore—gore Krisemose ke go...ke bana gagolo, ba—ba letela tše matšatši a. E—e retologetše go bana. Eupša ka kgonthe e swanetše go ba ba bagolo; e swanetše go be e ruta bana ba bona se Krisemose ya kgonthe e lego.

¹⁶ Gomme ka go felela ga ke dumele gore—gore Kriste a ka kgona go tswalwa ka letšatši la masomepedi tlhano la Desemere, ka Judea, ka gobane go tonya kudu go feta go le thwi mo bjale. Le a bona? Oo, gomme badiša ba ka kgona bjang go be ba hlokometše mehlape ya bona bošego? Gomme—gomme gona motšhelo le se sengwe le se sengwe, gomme Maria a swanetše go tla bokgole bjoo, go tloga tlasetlase ka Bethlehem godimo ka go Judea, godimo ka go Jerusalema, a ke re, mo go...bakeng sa motšhelo. Ga—ga—ga ke kgone—kgone—kgone go dumela seo. Go rotoga, ke a dumela o tla Natsaretha, gomme kafao ge...Seo—seo se ka go dirwa bjang. Se ka se kgone go—go dirwa, eupša ke a dumela gore Kriste o tswetšwe ka seruthwana, gobane ka tsela ye nngwe le ye nngwe O be a le

Kwana. Le a bona? Le a hlokomela, O belegwe ka lešakeng, gomme e sego ntlong?

¹⁷ Gomme ge ba Mo tšere go ya sefapanong (ba bangwe), bokgole bjo re tsebago, gore ga se nke a bolela ka Yena go ba hlahlala, eupša ba Mo hlahlile. A le be le tseba kwana goba nku e swanetše go etwapele go ya tlhabong? E—e ka se ye tlhabong, o—o swanetše go e etapele fao. Gomme ka mehla ke pudi ye e etellago dinku pele. Ka go—ka go mašakeng a go bolaya, ba na le pudi. Gomme pudi e tla sepela go rotoga tsela ye, go fihla e fihla godimo go hwetša nku e thomile go theoga tsela go bolawa, gomme pudi e tla tabogela ntle. Eupša ge ba etla nakong ba yago go bolaya pudi, ka kgonthe o tsoša tlhagaraga (o swanetše go ya ka gare) eupša, nmete, o ka se kgone go mmea molato. Eupša—eupša ke se—se selo ka fao nku e swanetše go hlahlwa, gomme O ile a hlahlwelwa tlhabong. Ba ile ba Mo etella pele. O be a le Kwana. Gomme ke dumela ka go tsela yeo go beng tlhago ka moka, gomme dikwana di tswalwa ka Matšhe, Aporele, le felotsoko go bapela ka kua, e sego moragwana go feta Mei. Gomme ga ke dumele e be e le eng kapa eng pele ga Matšhe le eng kapa eng ka morago ga Mei, nako ye nngwe go bapela ka kua.

¹⁸ Eupša ge kereke, Bokriste, bo nyadišitšwe ka go Boroma, e be e le ka go Khansele ya Nicaea, ge ba amogetše... setšhaba sa Roma se amogetše Bokriste le go dira se ba bego ba se bitša bodumedi bja lefasepharephare, e be e le Bokriste. Ba dirile bodumedi bja lefasepharephare, gomme ba rapetše medingwana ya maitirelo, gomme ba bile le modimo wa letšatši.

¹⁹ Gomme thwi bjale, go tloga go—go tloga go la masomepedi tee go ya go la masomepedi tlhano, letšatši le nyakile le eme ka go mohlala wa lona wa go swana bjalo ka ge le feta. Ke eng le se bitšago seo? E bile... ke naganne ke be ke se tseba, eupša ga ke kgone go nagana ka sona. Ge letšatši le—le... le—le hwetša nako ye ntši kudu gomme le lahlegelwa ke nako ye ntši, go fihla la masomepedi tee, gare ga la masomepedi tee le la masomepedi tlhano la Desemere. Oo, ke lebala se ba e bitšago. Eng? [Yo mongwe o re “Phifalo?”—Mor.] Aowa, phifalo ke ge e feta, letšatši le ngwedi di feta mmogo. Ke se sengwe ka kua, oo, nka—nka—nka kgona gabotse go se bolela eupša ga ke kgone thwi bjale. Go le bjalo, ke go šišimala mola ga letšatši mo go bitšwago ke Baroma (moo ke ge sorokisi e kgatlampana), le be le bitšwa *letšatši la matswalo a modimo wa letšatši*. Ba le ketekile go tloga ka la masomepedi tee go fihla ka la masomepeditlhano Desemere.

²⁰ Kafao gona, ka gore ye e be e sokologile, Roma ka go... Bokriste bo ile bja amogelwa, ka tsela ya bona ka Roma, nako yeo ba rile, “Re tla dira mokete wa go swana, le go dira *letšatši la matswalo la Morwa wa Modimo*.” Le a bona? Modimo wa letšatši, letšatši la matswalo a Jupitere, morago letšatši la matswalo la Morwa wa Modimo, la masomepedi tlhano a Desemere, le leo... .

²¹ Eupša e dira phapano efe? Le a bona, lehono ge re... Le ge e le...ge ba be ba e dira ka Julae goba Agostose, goba neng kapa neng e ka bago gona, e sa le bokgethwa bja go gopola gore “Modimo o re file kholofelo gore re ne yona ka go renā.”

²² Gomme bjale, le re, “Gabotse, ka moka ga bona ke bohle Santa Claus gomme ba ya pele boka ba dira; gobaneng, bokaone re ka no e dira.” Aowa, mohlomphegi! Aowa, wo ga se mokete wa bohetene go rena, ye ke iri ye kgethwa. Ge nkabe go se Krisemose, go ka be go se tsogo. Ge go ka be go se Krisemose: go ka be go se lerato, go ka be go se khutšo, go ka be go se morago ga fa bakeng sa modumedi; ge nkabe go se Krisemose.

²³ Gomme bjale, o re, “Gabotse, ge lefase ka moka, ba no...” Gabotse, le a bona, legadima la foroko ka go a maso, mafaufau a maru, go bontšha gore go ka ba seetša mo nakong ya leswiswi. Dietša tše bošegong bjo di netefatša seo, gore go ka ba seetša mo nakong ya leswiswi. Gomme seetša se kganya bokaonekaone bja sona neng? Ka leswiswing. O gotetša mabone a nakong ya mosegare, letšatši le phadima ka gare, go thata go lemoga a gotteditšwe. Eupša feelsa le tee le lennyane, seetša se sennyane se tla phadima go kganya ka kgonthe mo nakong ya leswiswi. Gomme thwi bjale ke leswiswi ge Mokriste yo mongwe le yo mongwe a swanetše go fa bopaki bja kholofelo ye e lego ka go yena, ya Jesu Kriste Morwa wa Modimo; e sego Kriss Kringle tsoko yo a tswetšego morago mošola, le a tseba, le mohuta wo mongwe wa mohlare o bonegile le go ya tlase go kgabola sethokgwa bošego bjo bongwe, kanegelo tsoko ya boikgopolelo yeo go se nago botlase go yona. Eupša re dumela ka go tia go Lentšu le le tshepišitšwego la Modimo la go tla ga Mesia, gomme O tswetšwe ka letšatši la Krisemose, la masomepedi... botse e ka ba mengwaga ye dikete tše pedi tša go feta, re a dumela.

²⁴ Kafao, bošegong bjo re ya go bolela gannyane nthatana ka tsela ya go fapana. Ke a thankā modiša wa lena o šetše a boletše, gomme ka kgonagalo o bolela Laboraro bošego gape gobane ke—ke a tseba o beile morago sehlogo tsoko goba se sengwe, go mpha sefala se bošegong bjo. Gomme ke nyaka a se tliše, ke nyaka go mo theetša.

Eupša, feelsa pele bjale re dira se, a re nong go inamiša dihlogo tša rena gape nakwana ya thapelo:

²⁵ Tate wa Legodimong, nakwana ye kgolo ye kgethwa ye, ge re nagana ka dilo tša go fapana ka Lengwalong fa, gore mogohle re yago, morago ka go Testamente ya Kgale, go bolela ka letšatši lela ge Modimo a tla romela Morwa wa Gagwe. Ka fao baprofeta bale morago kua ba beetšwego nako ya bona go seprofeto sa Lentšu la Modimo go tla go bona. Gomme ba profetile ka matšatšing a bona le go bolelapele dilo tše di bego di tla tla go phethega, gomme re e bona yohle e kopane fale ka Bethlehem bošegong bjola ge Modimo a ratile lefase bjalo

gore A neele Morwa wa Gagwe motswalwanoši. Re leboga Wena bakeng sa se.

²⁶ Gomme bjale, Morena, bošegong bjo ge re dula fase mo go—go bolela ka Lentšu la Gago; gomme Ke le lekgethwa kudu, Morena, ke ka baka leo re ratago go bolela le Wena pele. Gomme re a kgopela gore O tla bula kwešišo ya rena go Lentšu la Gago. Ka Leina la Jesu re e kgopetše. Amene.

²⁷ Bjale ke nyaka go bala Lengwalo le lengwe mo, feela kanegelo ya mehleng ya Krisemose, bakeng sa Lengwalo e hwetšwa ka go—ka go Mateo, tema ya 2. Gomme ge le sa phetla go yeo, le Johane 3:16.

²⁸ Gomme bošego bjo bongwe godimo ka Phoenix... Ge lena batho ba theipi fa, le theeditšego ditheipi, ke tla rata go lena go theeletša yeo: *Gobaneng Jesu A Ile A Swanela Go Tla Bethlehem*. Gobaneng A be a swanetše go se dira? Gomme dika tšela fale tša Dafida, di robetše le—le go leta godimo ga thaba, ba lebeletše tlase le go bona sešole sa Bafilisita se rakeletše. Gomme ke bapeditše yeo le lehono tlwa, le go hwetša gore Bethlehem... se e se rago.

²⁹ Gomme Kriste ke Bethlehem ya rena, le go kgona go netefatša gore motho yo mongwe le yo mongwe yoo a tswetšwego ke Modimo o tswetšwe ka Bethlehem, gobane Kriste ke Bethlehem. Gomme seo ke se A bego a le sona, *Borotho bja Bophelo*. Gomme Beth, *B-e-t-h* e ra e ra—e ra “ngwako,” *E-l* ke “Modimo,” gomme e-l-h-e-m ke *Elhem* e rago “borotho,” gomme “Ngwako wa Borotho bja Modimo.” Gomme Jesu Kriste o be a le “Ngwako wa Borotho bja Modimo,” Borotho bja Bophelo bjo Bosafelego. Gomme motho yo mongwe le yo mongwe yoo a tswetšwego ka go Kriste, o tswaletšwe ka go *Bethlehem*, “Ngwako wa Modimo wa Borotho.” Le ka fao gore dilliki tša dikereke tše lehono di rakeletšwe, boka Bafilisita, go thiba batho go tloga go Yona.

³⁰ Le ka fao banna bale ba bagale, ba tsebago gore Dafida o be a tloditšwe gomme o be a eya go tlotšwa kgoši letšatši le lengwe... go se tsebalege kudu nako yeo, ka baka la gore o be a le moneneri magareng ga batho ba gagwe, eupša letšatši le lengwe pitšo ya gagwe e tlide. Ba bile le banna ba bagale le yena. Gomme elelwang, banna bale e be e le Bantle, bontšintši yo mongwe le yo mongwe wa bona e be e le Bantle, sekai se sebotse kudu sa lehono. Gomme monna yo motee o be a le bogale kudu, o bolaile banna ba makgolo seswai ka eng... ka lerumo la gagwe, yenamong, ka letšatši le tee. Yo mongwe a eme tšhemong ya ditlhodi, gomme sešole se rotoga, madira. Gomme bohole ba bona ba kitima, gomme o eme fale le go bolaya banna go fihla matsogo a gagwe a lapile. Gomme morago yo mongwe, kafao a tabogetšego ka moleteng le go bolaya tau ka letšatši la lehlwa, ka seatla se setee. Gomme Filis... goba Moegepeta o mo

kitimetše, ka lerumo le letelele, gomme o tšere lepara gomme a ratha lerumo le go tšwa seatleng sa gagwe, a tšea lerumo gomme a bolaya Moegepeta yenamong, gomme a bolaya balaodi ba makgolotharo.

³¹ Gomme efa banna ba bagolo! Dafida a goeletša, “Ge nka kgona go nwa gatee gape, le a bona, go tšwa sedibeng sela!” (moo a bego a tlwaetše go noša dinku tša gagwe ge a be a eya ka ntle mo mosong, go tšwa šakeng, di be di nyaka meetse a go nwewa) Gomme banna ba ba gogile ditšoša tša bona le go lwa go kgabola dimaele tše lesometlhano tša batho, ba tlišitše meetse a morago.

³² Gomme Dafida o rile, “A go be kgole, gore ke a nwe.” Gomme a a tšhela godimo ga mobu bjalo ka moneelo wa seno go Morena. A sekai se sebotse sa selo sa go swana, sa yo Johane 3:16, bošegong bjo.

*...Modimo o ratile lefase kudu, go fihla A neetše
Morwamotswalanoši wa Gagwe,...*

³³ Gomme Kriste o dirile eng? Bophelo bjo A ilego a swanela go bo phela ka Gosafelego, O bo tšholletše godimo ga mobu go tšwa ditšikeng tša Gagwe, bophelo bja Gagwe bja tlhago, godimo ga mobu bjalo ka moneelo wa sebe bakeng sa rena. Le ka fao Bantle lehono, banna ba go hlomphega, banna, banna ba bagolo, ba tše tšhoša, gomme ba eme fale le go sega tsela ya bona go kgabola go hwetša meetse a maswa bakeng sa Kriste (Dafida wa rena), e lego sa go se tume lehono. Eupša Dafida wa rena, yo re tsebago gore O tla ka maatleng, O ya go gatakela setšhaba se sengwe le se sengwe ka tlase ga dinao tša Gagwe ka mokgwa woo, le go ba buša ka molamo wa tshipi. Gomme banna ba bagale ka kgonthe, ba eme le Lentšu la Modimo gomme ba rema go tloga lehlakoreng go ya lehlakoreng ntle le poifo, gobane re a tseba O tla ka maatla.

³⁴ A re baleng bjale, ka morago ga Johane 3:16; a re baleng ketelo ya—ya Babohlale ba Mokgethwa Mateo, tema ya 2.

*Bjale ge Jesu a tswetšwe ka Bethlehem ya Judea ka
matšatšing a Herode kgoši, bonang, go tlide banna ba
bohlale go tšwa—go tšwa bohlabela go ya Jerusalema,*

*Ba re, O kae yena yo a tswetšwego Kgoši ya Bajuda?
ka gore re bone naledi ya gagwe ka bohlabela, gomme re
tlide go mo lotšha.*

*Ge Herode kgoši...a kwele dilo tše, o ile a
tshwenyega, le Jerusalema yohle le yena.*

*Gomme ge a kgobokeditše...baprista bagolo le ba
mangwalo ba batho mmogo, o nyakile go bona moo
Kriste a swanetšego go tswalwa.*

*Gomme ba rile go yena, Ka Bethlehem ya Judea:
gobane kafao go ngwadilwe ke moprofeta,*

Gomme wena Bethlehem, ka nageng ya Juda, ga o yo monyennyane gare ga bakgomana ba Juda: . . . go tšwa go wena go tla tla Mmušiši, yo a tlago go buša batho ba ka Israele.

. . . Herode, ge a bileditše banna ba bohlale sephiring, o ba botšištše ka tlhoafalo ke nako efe naledi e bonagetšego.

Gomme o ba rometše Bethlehem, gomme o rile, Eyang le nyakeng ngwana yo monnyane ka tlhoafalo; gomme ge le mo hweditše, ntlišetšeng lentšu gape, gore nke ke tle gomme ke mo lotšhe le nna.

Ge ba . . . kwele kgoši, ba tlogile; gomme, bonang, naledi, ye ba e bonego ka bohlabela, e ile pele ga bona, go fihla e tlide le go ema godimo moo ngwana yo monnyane a bego a le gona.

Gomme ge ba bone naledi, ba hlaletše ka lethabo le legolo go fetiša.

Gomme ge ba etla ka ntlong, ba bone ngwana yo moswa le Maria mmagwe, gomme ba wela fase, gomme ba mo lotšitše: gomme . . . ba butše mahumo a bona, ba file dimpho go yena; gauta, . . . diorelo, le mira.

Gomme ka go sebotšwa ke Modimo mo torong gore ba se ke ba tloga . . . ga se ba swanela go boela go Herode, ba ile nageng ya bona beng ka tsela ye nngwe.

³⁵ Go tlaba kudu fa ka fao gore Modimo, ka tsela ye nnyane, . . . Modimo o bolela le batho ka ditoro. Ke a e dumela. Eupša ka fao gore Modimo ka go taba ye o šomišitše sa bobedi.

³⁶ Bjale, toro ke . . . toro, ge e hlatholotšwe ka maleba, e swana le pono; ge e le toro gomme ya hlathollwa. Modimo o e šomišitše go tloga moragorago ka go Testamente ya Kgale le tlase go kgabola mabaka, gomme o tshepišitše ka matšatšing a mafelelo go e šomiša gape. Bjale, batho ba ka kgona go ja go fetiša le—le go ya pele gomme ba ba le dikatapowana, gomme ga se—ga se kgonthé, ditoro tša semoya, ga e kwagale ge o—ge o e bala. Gomme tše dingwe tša yona di ka no bonala di lokile, eupša efela go na le tša nnete, ditoro tša semoya. Gomme re a tseba mo ka tabarenekeleng gore Modimo o fa batho ditoro gomme di a hlathollwa, gomme tša tla go phethega, gomme ke nnete. Eupša ke tsela ya bobedi ya go e dira. Le a bona?

³⁷ Bjale, lebaka le e dirilwego nako yeo, e bile ka gobane go be go se moprefeta ka nageng mo nakong yela, go hlatholla toro. Le a bona? Go be go se moprefeta go hlatholla ditoro, boka Josefa le—le Daniele le baprofeta bale ba kgale. Ba be ba se na le moprefeta lebaka la mengwaga ye makgolonne, gomme Modimo o šomišitše toro go . . . bakeng sa katlego ya Ngwana wa Gagwe Mong. O dirile.

³⁸ O boditše Josefa, ge a be a le “monna wa moloki, a sa rate go mo dira mohlala wa phatlalatša, o be a nagana go mo tlogela ka sephiring.” Ga go pelaelo o mmoditše ketelo ya Gabariele le go ya pele, le se a se boletšego; eupša ge a mmone go ba mme, e—e be e le sa go se tlwaelege kudu. Le a tseba, e no . . . e be e le se sengwe go fapana kudu. Gomme le a tseba, seo ke se e lego taba lehono. Modimo o dira dilo tša go se tlwaelege, gomme ga se tša tlwaelega kudu go fihla le monna a no se kgone go e bona.

³⁹ Josefa ga se a kgone go e kwešiša, e be e le sa go se tlwaelege kudu. O be a le monna wa go loka, ga go selo sa phošo ka yena. O be a le monna wa go loka, monna wa moloki, eupša e be e se sa mehleng kudu. Le a bona, Josefa ka kgonagalo bogolo bja mengwaga ye masomenne goba masomenne tlhano, se sengwe boka seo, ba a tleleima, ge yena le Maria ba be ba beeletšane. Eupša mo re hwetša se sengwe seo se sega sa ke sa direga: mosadi yo a beleditšwego ke monna yo gomme go le bjalo o hwetšwa go ba mme! Gomme go be go se gwa tlwaelega kudu Josefa o be a nagana go mo tlogela. Eupša thwi ka go nakwana yela ya tšhoganetšo, Modimo o rometše Morongwa wa Gagwe, gomme a bonagala go yena ka torong le go re, “Se boife go itšeela Maria mosadimogatša wa gago, gobane Seo a se imilego ka go yena ke sa Moya wo Mokgethwa.”

⁴⁰ A tumelo ye mpsha ya go tswalwa Josefa a swanetšego go ba a bile le yona ge a tsoga go tšwa fao! Le a bona, ga se nke a ke a hloka tlhathollo e ka ba efe, toro e be e se dika. E be e le thwi go otlologa ntla, “Se boife go tšea Maria mosadimogatša wa gago, gobane Seo a se imilego ka go yena ke sa Moya wo Mokgethwa.” Go be go se moprefeta go fa tlhathollo, kafao e ile ya swanela go tla thwi, thwi ka go otlologa ka mokgwa woo; go Modimo . . . go tloga go Modimo go ya go Josefa. Bjale . . . gomme Modimo o tšere tsela yela ya bobedi.

⁴¹ E re ruta eng thwi mo, pele re thula sehlogo sa ren? Sese se e re rutago sona: gore Modimo a ka diriša mothopo wo mongwe le wo mongwe wa ren a ge re o gafetš- . . . o neetšwe go Yena. A ka diriša monagano wa ren, ditoro tša ren, letswalofase la ren, letsvalo la ren la mathomo, leleme la ren, dipina tša ren, mahlo a ren, a ren. . . . Se sengwe le se sengwe seo re nago le sona se ka šomišwa ke Modimo ge se gafetšwe go Modimo. Le a bona? Se sengwe le se sengwe o lego sona, se neela go Modimo. O tla šomiša lešobana le lengwe le le lengwe le karolo ye nngwe le ye nngwe ya gago, O tla e šomiša. Ga go kgathale se e lego, O tla se šomiša ge se hlwekišeditšwe morero le pitšo ya Gagwe.

⁴² Bjale, bošegong bjo re ya go bolela ka: *Dimpho*. Gomme ke nyaka go fa ye thaetlele, ge . . . ke ngwadile, ke gwadigwaditše se sengwe fase ka kua, ge Ngwanešu Neville a be a le godimo: *Dimpho Tša Modimo Ka Mehla Di Hwetša . . . Dimpho Tša Modimo Ka Mehla Di Hwetša Mafelo A Tšona*. Dimpho tša

Modimo ka mehla di a ganwa, eupša ka kgonthe e hwetša lefelo la yona ge . . .

⁴³ Bjale, šetšang mpho ye banna ba bohlale ba e tlišitšego . . . goba go e tliša go Yena. Lehono re a hwetša gore re fetola dimpho. Yo mongwe le yo mongwe o swanetše go hwetša mpho, le go leka go nagantshiša se moisa wa go latela a yago go mo fa, gore a kgone go mo fa se sengwe go bapetša bontši bjoo. Gomme ge e se yona, gabotse, go ya Ngwaga wo Moswa, o ikwela gore o swanetše go e lokiša. Gomme yo mongwe le yo mongwe a ithuta le go tshwenyega le go sepela lebatong, boradimilione, ka fao ba yago go feta. Ba fa bontši kudu go *yo le yola*, mola go—go le phošo gohlegohle. Go—go—go—gohlegohle . . . Krisemose . . .

⁴⁴ Fa: go ne mpho e tee feela yeo o ka kgonago go e fa, gomme yeo ke wenamong. Neela bowena go Modimo ka gore Modimo o šetše a go file Mpho ya Gagwe. Bjale, go na le selo se nnoši o se kolotago morago go Modimo, seo ke bowena go Yena.

⁴⁵ Bjale, gomme makga a mantši, *maina* a ka Beibeleng. Ga re sa e lemoga gape, lehono. Re . . . Ka mehla le nkwele ke kwera leina le, la bana ba bitša . . . goba batho ba bitša bana ba bona “Ricky.” Bjale, *Ricky* ke leina la go šiiša! Le a bona? Gomme ke . . . ga se o swanele go ba bitša leo. Ge o na le ngwana yo a bitšwago Ricky, hle moka, le fetolele go se sengwe gape. *Ricky*, goba—goba *Elvis*, goba se sengwe boka seo . . . *Ricky* go ra “legotlo.” Le a bona? Gomme kafao o—o ya . . . Gomme—gomme se o se bitšago motho, seo se gatelela seo. Mohumagadi yo monnyane, letšatši le lengwe, o bile le mošemane yo monnyane ntle fale a bitšwago “Ricky” gomme leina la gagwe ke Ricky, James Ricky. Gomme ka gobane le be le tsebalega kudu (*Ricky*), ba mmiditše “Ricky.” Ke rile, “Fetola leina leo!”

⁴⁶ Ke lemoga batho ba bangwe ba dutše thwi fa bjale bao ba nago le setlogolomorwa se sennyane, gomme leina la gagwe ke . . . yo motee—mošemane yo monnyane ke yo mobosebose, moisa yo monnyane wa go thabiša; gomme yo mongwe ke Ricky, gomme seo ke se a lego. Le no mo šetša, tlhago ya gagwe e no ba ka mokgwa woo. Gomme o . . . ke rile go ba bangwe ba bokhukhu ba gagwe, goba yo mongwe, ke rile, “Botša mme a fetole leina la mošemane yola, o no fetola leina lela godimo gomme hlokomela se se diregago go segotlane.” Le a bona, lena batho ga le nyake go dumela seo. Re nagana gore re phetše botelele kudu bakeng sa seo.

⁴⁷ Ge go se sengwe ka go leina, gona gobaneng ge feela Jakobo a be a bitswa *Jakobo*, go rago “moradia, mofori,” seo ke se a bego a le sona? Eupša ge a katane le Morena bošego bjohle, gomme Morena o fetotše leina la gagwe, gomme e ka ba . . . ge a be a le e ka ba bogolo bja mengwaga ye masometshela. O fetotše leina la gagwe go tloga—go tloga—go tloga go Jakobo go ya go *Israele*, “mokgoma pele ga Modimo,” gomme seo ke se a bego a le.

Gobaneng Abram a biditšwe . . . o ile a swanelo go bitšwa “Abraham” pele lesea le ka tswalwa? Gobaneng Sarai a biditšwe “Sarah” pele lesea le ka tswalwa?

Gobaneng Paulo . . . goba go bitša . . . leina la gagwe e be e le Saulo, eupša ge a kopane le Jesu, O mo fetotše go tloga go Saulo go ya go “Paulo.”

Ge Simone a be a fetolwa go tloga go Simone go ya go *Petro*, go rago “letlapa le lennyane.” Gomme—gomme maina a bona ohle a ile a fetolwa, ke ka gobane se o se biditšego ke se sengwe ka ga sona. Ge o bolela se sengwe, se a itsebiša ka bosona. Ga ke nyake go tsena ka kua, gobane e tla godimo Lamorena le le latelago bošego, le a bona, boitsebišo bja lentšu. Gomme, eupša bjale, re hwetša dilo tše therešo kudu.

⁴⁸ Bjale šetšang, Modimo . . . A selo sa go tlabo se lego bošegong bjo, go bona gore banna bale, Babohlale, banna ba go rutega, banna ba bagolo . . . ba etla tlase go tšwa Bohlabela, yeo e bego e le Babilonia, e bego e le India. Gomme ga se ba ke ba tla ka gare e ka ba bofe bošego bjhole, le go thoma bošego bjo bongwe le go fihla kua la go latela, ba be ba le e ka ba mengwaga ye mebedi go fihla fale. Ga se ba ke ba tsoge ba tla go Lesea le lennyane ka legopong. Ba tlie go Ngwana yo moswa, Ngwana yo moswa. Gomme Herode o bolaile bana go tloga bogolo bja mengwaga ye mebedi. Le a bona, go tseba gore e be e se segotlane se sennyane se robetše ka tharing, o be a tla no bolaya masea ohle. Eupša o bolaile bana ba baswa, gore a be le nnete go Mo hwetša, kae kapa kae go tloga go mengwaga ye mebedi ka bokgale morago. O beile nako godimo ka gobane a tseba ga se a nyaka go bolaya ba bantsi kudu, bohle ba bona, o mno . . . gobane ba be ba le bontši boka makgoba go yena. O be a nyaka go hwetša . . . go ba le nnete go Mo hwetša, kafao o rile, “Segotlane se tla ba e ka ba mengwaga ye mebedi bogolo. Kafao, se sengwe le se sengwe go tloga bogolo bja mengwaga ye mebedi go theoga, se bolayeng.” Le a bona?

Gomme seo se tlištše go phethega se moprofeta a se boletšego, gore “Ka—ka Rama go tla kwewa go—go goelela goba go lla, go golola; gore Ragele o llela bana ba gagwe, gomme ga ba gona.”

⁴⁹ Bjale, a le lemogile gore banna ba bohlale ba, banna ba bagolo, ba be ba le godimo ka Babilonia gomme ba bone Naledi ya Gagwe, re rile, “Re bone Naledi ya Gagwe ka bohlabela gomme re tlie go Mo lotšha.” Ba tšwa bohlabela, moo ba bonego Naledi, e eya bodikela. Gobane India ke bodikela, leboabodikela la Bab . . . la—la Palestina. Gomme ba tla thwi tlase go kgabola Noka ya Tigris le go tshelela mošola wa melala thwi ka gare, ba tlie tlase ka Bethlehem moo ba hweditšego le—le—le Lesea. Gomme elelwang Josefa le bona ga se ba ke ba tloga fao; ba ile thwi tlase Natsaretha gomme ba godiša Ngwana, thwi fale.

⁵⁰ Bjale, re bona fa gore ba tlišitše...Banna ba, ka go ba baithutadinaledi le go ithuta dinaledi, gomme go boneng dietša tše tša sephiri tša selegodimo di tšwelela godimo kua, gore go be go le se sengwe se eya pele; gore ba tsebile gore yoo ke Mesia, mmu—mmu Mmuši wa magodimo le lefase, o be a swanetše go tswalwa. Gomme ba a tla, ba tseba gore Bomodimo bo be bo tla tswalelwa, go bewa ka ntlong ka go mo—mo motho; gobane go le laetša bopaki bja bona...Le a tseba, le a tseba, bophelo bja gago bo bolela kudukudu go feta mantšu a gago, go fihla go sa kgathale se o se bolelago, batho ba tseba se o lego sona ka—ka se o lego.

⁵¹ Gomme šetšang batho ba, Babohlale ba, ba Mo tlišeditše... Šetšang dimpho tše ba Mo tlišeditšego, di tsebagaditše se ba nagannego O be a le sona. Ba Mo tlišeditše gauta, seorelo, le setlolo. Gomme bjale šetšang se dika tše, tše o ke nyakago go bolela le lena ka tšona bjale...ke se dika tše di se rago. Bjale, ke na le Lengwalo tsoko le ngwadilwe ntle mo le re tla balago feela ka nakwana ka lona, Morena ge a rata.

Bjale: gauta, le seorelo, le mira.

⁵² Bjale: gauta ka Beibeleng...e swanela bjang go Kriste, gobane gauta e bolela ka Bomodimo. *Gauta* ke “Bomodimo.” Re tla fihla go yona feela mo nakwaneng. *Seorelo* se bolela ka “tirelo.” Gomme *setlolo* ke “lehu.” *Modimo, Bomodimo, mo tirelong go hwa*. Gomme seo ke se A bego a le sona. Sona selo seo ba se tlišitšego se tsebagatša seo ba nagannego O be a le sona.

⁵³ Gomme ke bolela seo go rena lehono, “Dilo tše re di tlišago go Yena di tsebagatša se dikgopoloo tša rena di lego ka ga Gagwe.” Le kwešiša se ke se rago? Le a bona? Ge o le...Ge o E dumela ka pelo ya gago yohle, Lentšu le lengwe le le lengwe la yona, o tla e tsebagatša ka go fa tsohle tše o nago go Yona. Le a bona? Eupša ge o dumela ke lefelo le lebotse go amana le batho ba bakaone, go dikologa kereke le dilo tša go swana le tše, seo e no ba ka ga se o se fago (feelaa diiri di se kae tša leago le ba bangwe ba phuthego goba se sengwe). Eupša ge—ge ka kgonthe o E dumela ka pelo ya gago yohle, gona o fa se sengwe le se sengwe seo se lego ka go wena go Yona. Le a bona? Gomme e a go tsebagatša, gore ka therešo o dumela Molaetša, gore o o dumela go ba Therešo.

⁵⁴ Batho ba bantši kudu ba re, “Nka kgona go dumela bontši *bjo*. Nka kgona go dumela *bjalo*.” Barutiwa...ke a dumela nako ya mafelelo mo, ke boletše ka yeo: *Badumedi, Baitirabadumedi, Le Basedumele*. Seo e be e se yona? Ke...a ga se ke bolele ka seo fa? Le a bona? Gomme motho mongwe le mongwe, šetšang legoro la bona. Le a bona, go tla tla lefelong moo ba ka kgonago go tše a bontši bja yona bjalo, ba ka se kgone go tše a ka moka.

⁵⁵ Bjale, dimpho tše di be di swanela bjang go leeto la Kriste mo lefaseng, Lesea le tswalwa fa mo lefaseng. Gomme dimpho tše tše o banna ba bohlale ba di tlišitšego go Yena, di nno swanela

feela tlwa thomo ya Gagwe go tšwa go Modimo le leeto la Gagwe lefaseng.

⁵⁶ Bjale, selo sa pele: Modimo. Yo e be e le Modimo, Jesu o be a le Modimo ka sebopego sa motho. Seo se thata go batho go metša seo, le lehono, gore “O be a le Modimo.” Gomme O... Seo ke se A bego a le sona. O be a se selo sa fase go feta Modimo. O be a le Modimo a bonagaditšwe nameng. O be a le Mohlodi ka tlholong ya Gagwe Mong. Bjale gore... O be a le Mohlodi ka go tlholo ya Gagwe, ka tlholo, bakeng sa tlholo. O be a le Mohlodi ka tlholong ya Gagwe, ka tlholo ya Gagwe, bakeng sa tlholo ya Gagwe. Yohle e tatagana morago ka go Modimo, selo ka moka. A ga le bone? Botlalo bja Modimo! O be a le Mohlodi bontši go fihla A be a le Modimo. Gomme O be a le Sephedi lefaseng (Sephedi sa nako), se se rago gore O swanetše go ba le mathomo, kagona O itlholetše mmele Yenamong go phela ka go ona. Modimo, ka Boyena, o hlotše mmele ka Boyena. Le a bona? Gore ka tlholo ye, A ke a phološe tlholo ye e lahlegilego yeo A e hlotšego.

⁵⁷ Ga go selo seo motho a ka se fedišagomoka, ga go selo se tee. O ka se dire selo go senya ka go feleta eng kapa eng. O ka no tšeä seripa sa pampiri gomme wa se tšuma, o ka no tšuma moago lorelore, o ka no tšuma mohlare lorelore; ga se o o fedišemoka. Lena... phišo yela ka fale, mollo wola woo o phatlogago godimo, tšeö e no ba dikhemikhale di phatloga. Di boela morago go se di bego di le sona mathomong. Ga se tša fedišwamoka. Ge o tšuma phatša ya legong (le lefase, wa re, ge eba re phetše ka Bokagosafelego bjalo ka Modimo, gomme dikhemikhale tšela go tšwa go legong lela le mollo wola di ile morago go mathomo a yona a setlogo gomme ya yona...ka go e ka ba eng e bilego, go pšhatlega ga diathomo le go ya pele, le—le lefase, le re, le tla ema lebaka la dimilione tša mengwaga), wo o ka kgonago go tla thwi morago gape le go ba mohlare wo mongwe, feela tlwa boka o bile.

⁵⁸ O ka se kgone go fedišamoka eng kapa eng ka baka la gore ke Lentšu le le boletšwego la Modimo. Amene! Oo, gomme seo se ntira ke ikwele bodumedi, bjale. Le a bona? Se Modimo a se bolelago, Se eme go ya go ile. Amene! Le a bona, o ka se kgone go fedišamoka. Re karolo ya lefase le, gomme re ka se tsoge ra fedišwamoka go feleta. Aowa, mohlomphegi. Sebe (soulo) se tla fedišwamoka, re lemoga seo. Eupša mme—mme mmele wo re phelago ka go ona, o ka se kgone go fedišwamoka. Le a bona?

⁵⁹ Bjale, kagona, Modimo o itlholetše mmele Yenamong. O be a le Mohlodi, gomme o hlotše tlholo ya Gagwe Mong, gore ka Tlholo ye A ke a phološe bona bao ba lahlegilego ka go tlholo ya Gagwe (yoo ke wena le nna, dibopiwa tša nako).

⁶⁰ La Gagwe—Lentšu la Gagwe tlwa le laeditše gore... Yena le mediro ya Gagwe e netefaditše gore O be a se selo bonnyane go feta Mohlodi. O tšere seripa sa borotho gomme a bo ngwatha, gomme o tšwetšepele a ngwatha seripana se tee sela sa borotho,

gomme a fepa batho ba dikete tše tlhano go tšwa go bjona; gomme o tšere diroto tše šupago di tletšego tša marathana a mašaledi, gomme yo mongwe le yo mongwe fale o bile le go—go—go khora go felela ka borotho.

⁶¹ O tšere hlapi gomme a matlola hlapi yela. Bjale ge re lemoga gore O hlodile hlapi yela mo mathomong. O ile a hlola borotho bjola mathomong. Eupša O tšere hlapi yela gomme a matlola hlapi yela. Hlapi ye e phelago e bile, gomme nako yeo ya apewa goba—goba ya gadikwa; gomme e ka ba neng A e ngwathilego, e ka ba eng e bilego (go apewa goba go gadikwa), e hlogile gape (motsotso wa go swana woo A e ngwathilego) ye nngwe ya go apewa goba hlapi ya go gadikwa. A seo ga se makatše? Seo se laeditše gore O be a se selo bonnyane go feta Jehofa. Gomme ka gona O be a le Mohlodi yo a kgonnego go tšea tlholo ya Gagwe Mong, gomme ka tlholo ya Gagwe, a hlagiša O be a le Mang. Haleluya! Seo se netefaditše gore O be a le se A bego a le sona. O be a le Bomodimo. Kafao, gauta e be e Mo swanetše, ka moneelong tswalong ya Gagwe. O be a le Bomodimo bo dirilwe nama.

⁶² Nka no lahlelaa sengwe- . . . Ga go basetsebje magareng ga rena bošengong bjo, ke a nagana, kafao . . . ka kopanong ye ya thapelo. Eupša a nke ke bolele se sengwe. A Jesu, ge A be a le mo, . . . ? Bjale, ye ke bakeng sa go nagana, e sego bakeng sa . . . mohlomongwe . . . go senka a ke re. Hlokamelang, feela bakeng sa go nagana, Jesu o rile, ka go Mokgethwa Johane 14:12, “Yo a dumelago go Nna, mediro ye Ke e dirago o tla e dira le yena le ye megolwane go feta wo o tla e dira, ka gore Ke ya go Tate wa Ka.” A le hlokometše seo? Hlokamelang, bjale, yoo e be e le Morwa wa Modimo a tshepiša go modumedi, gore dilo tše kgolwane go feta A di dirilego, (ka matšatšing a a mafelelo) gore modumedi o tla dira dilo tše kgolwane go feta A di dirilego. Mokgethwa Johane, tema ya 14, temana ya 12. A yeo ke nnete? A le dumela Jesu o e boletše?

⁶³ Hlokamelang, ge Jesu a hlotše borotho; O tšere seripa sa borotho, gomme a hlola borotho bjoo bo bego bo šetše bo bile borotho. Ge A hlotše hlapi; O tšere hlapi yeo e hlodilwego hlapi pele, gomme a bea hlapi ye nngwe go tšwa go yona. A yeo ke nnete? O tšere meetse, ao ka kgonagalo a bego a tla ba beine, gomme a dira beine go tšwa go ona. A yeo ke nnete? Eupša re Mmone ka magareng ga rena, ka go matšatši a a mafelelo, a hlola dilo thwi ntle, ntle le e ka ba eng e emego kua! A yeo ke nnete? Go hlola sehlorana moo go sego dihlorana. Thwi! Oo, O . . . dula a le Modimo. O no ba Bomodimo kudu lehono bjalo ka ge A bile nako yela gomme go kile gwa ba, goba go tsoge gwa ba. O sa le Modimo, gomme a hlohla dipelo go e dumela, “Dilo tše kgolwane go feta se, lena . . . ntle le e ka ba eng go swara le go robega go tloga go sona. E bolele, gomme go tla ba bjalo.”

⁶⁴ Hlokamelang bjale, re hwetša gore ya Gagwe . . . O tsebišitše. Mediro ye A e dirilego e tsebagatša gore O be a le Bomodimo, e laeditše gore O be a le. Ka gore O rile, “Ge Ke sa dire mediro ya Tate wa Ka, gona le se Ntumele.”

⁶⁵ Gomme a Mokriste a ka se kgone go bolela lehono, “Ge ke sa dire mediro ya Mophološi wa ka, le se ntumele”? Le a bona?

⁶⁶ “Bjalo ka ge Tate a Nthomile, kafao Ke roma lena.” Gomme ge o dirile mediro, mediro tlholo ya Tate yoo a Mo romilego, gona ke tlholo . . . Kriste (Mohlodi) yoo a re romago, o dira mediro ya Kriste Mohlodi. Le a bona? “Bjalo ka ge Tate a Nthomile, kafao Ke roma lena. Gomme ge Ke sa dire mediro ya Tate wa Ka, se ntumeleng.”

⁶⁷ Gona Mokriste lehono o swanetše go dira Bophelo bjoo Kriste a bo dirilego goba re ne tokelo go re, “Ga go bjalo.”

⁶⁸ Hlokamelang bjale, mediro ya Gagwe e Mo hlotše . . . goba go Mo tsebagatša go ba Mohlodi. Mediro ya Gagwe ye A e dirilego e rwešitše mphaphahlogo bopaki bja bophelo bja Gagwe, gore O be a le “Mohlodi”; ga go tsela ya go tloga go yona. Kagona, ge ba be ba neela mpho ya gauta, ba be ba le kwanong ka go phethagala le Modimo ka mpho ya bona. Ba Mo fa gauta, ye e Mo tsebagaditše bjalo ka Bomodimo. Ka mehla mphaphahlogo, mphaphahlogo wa gauta . . . hlogo ya gauta, ya Kgoši Nebukadinetsara. Yohle, le a bona, e . . . ka mehla Bomodimo bo emetšwe ka gauta.

⁶⁹ Bjale: *seorelo*. Re nyaka go hwetša tše ka pela. *Seorelo* ke “moneelo wa tirelo go Jehofa.” Bjale, ge le nyaka go bea Mangwalo a fase, Lefitiko 2:2, le Lefitiko 16:6 go ya go 15. Re hwetša gore yeo ke tshepedišo ya boprista, go dira moneelo go Jehofa. Ge a dirile moneelo, o ile wa swanelwa ke go dirwa le go tswakanywa ka seorelo bakeng sa moneelo wa sebe, ba tšere dilo tša go fapanwa le go di hlakanya. Ka gore bupi bja moneelo, bja moneelo wa go šišinywa, seorelo se be se okeditšwe. Ka gore, e be e le go amogelega go Jehofa ge eba e be e tloditšwe ka *seorelo*, seo se rago ke “tirelo go Jehofa, Modimo.” Gomme, bjale, re hwetša gore Yena ke Bomodimo. Gomme ba Mo tlišeditše seorelo, e be e le sekai gore O be a le tirelo go Jehofa. Jesu ke Mohlanka wa Jehofa.

⁷⁰ Bjale, ka go Mokgethwa Mateo 12:15 go ya go 21, re hwetša gore O be a le Mohlanka wa Jehofa, “Bonang Mohlanka wa ka, yo Ke kgahlwago ke Yena” (gomme O be a le) “gomme Ke beile maatla a Ka godimo ga Gagwe.” Kafao bophelo bja Gagwe bo tloditšwe ka seorelo, go tirelo ya Jehofa. A mpho bona banna ba bohlale ba e filego! Le a bona, e be e le se sengwe go . . . mph—mph mph ye ba e fago, e be e le se sengwe go tsebagatša Jesu bjalo ka Mohlanka wa Jehofa.

⁷¹ Bjale ge re ka no dira seo, go tsebagatša maphelo a rená. Le a bona, maphelo a rená go tsebagatšwa bjalo ka mohlanka wa

Jehofa. Seo ke se setlolo se bego se le bakeng sa sona, seo se Mo dirile Jehofa Mohlanka.

⁷² Bjale, *mira*, m-i-r-a, e be e le “tlotšo ya lehu.” Re hwetša ka go Mokgethwa Johane, tema ya 19, temana ya 39, yeo e e ya go ti-ti tirelo ya poloko ya Jesu, ge Maria le bona ba ile, ba tšere mira wo go Mo tlotša ka ona; gobane O swanetše go ba Mohlanka wa lehu bakeng sa Jehofa. Le a bona? Yo mongwe o ile a swanelo go hwa. Yeo e be e le tirelo ye e bego e swanetše go direlwa Modimo, gomme ga go yo a bego a na le maswanedi go e dira eupša Modimo ka Boyena. Kafao, go tliša mira—mira, go laetša seo ka Bomodimo, le ka tirelo, gore gape O be a tloditšwe ka mira; gore Bomodimo bjo bo be bo swanetše go bewa lehung gore a phološe yo motee wa go se phethagale. Oo, a selo se segolo!

⁷³ Tlholo ka moka e be e lahlegile. Re nno ya go e kgabola ka go Mahuto a Šupago. Le a bona, tlholo ka moka e be e lahlegile, se sengwe le se sengwe se be se ile. Yohle e be e le ya Sathane. O bile mojabohwa wa yona gomme o sa ntše a le mong wa yona. Ka kgonthe o a dira. Ke ka lebaka leo re lwago le go ba le bothata bjohle bjo. O laola mmušo wo mongwe le wo mongwe; Sathane o a dira. Mmušo wo mongwe le wo mongwe, kgoši ye nngwe le ye nngwe, mmušo wo mongwe le wo mongwe, o laolwa ke Sathane. Lefase ka moka le laolwa le go bušwa ke Sathane. Ke ka lebaka leo re nago le mathata ao re nago nao. Moithuti yo mongwe le yo mongwe wa Beibele, goba eng kapa eng, a ka kgona go go botša gore Sathane. . . Gabotse, Beibele ka Boyona e re o dirile, le a bona, gore o laola lefase. Eupša Kriste o tla ba Mojabohwa go lona, ka gore bjale Yena ke Molopolodi wa rena. Gomme O tla go lopolla tlholo ka moka, gomme ga se gona se kgonnego go e dira eupša Modimo Yenamong.

⁷⁴ Ke ka lebaka leo gore Modimo ga a dire selo ka ntle ga motho. Ka mehla o šoma ka motho gobane O be a swanetše go šomiša motho. Motho ke se A bego a swanetše go se šomiša go pealatša kgopoloo ya Gagwe ya Mopholoshi. O ile a swanelo go mo dira ka seswantšho sa Gagwe, go mo dira se sengwe boka Yena, gomme a mmea godimo ga moemedi wa kgetho ya maitshwaro gomme a mo dumelela go dira ka tsela ye nngwe le ye nngwe a bego a nyaka. O be a ka kgona go tšea kgetho ya gagwe. Gomme O tsebile monna yola, ka go mo fa kgetho ye, o tla wa. Kafao go beng gore Yena o be a swanetše go dira seo, O a retologa le go dira mothuši wa Gagwe, le go se dire selo ntle le ge A e dira ka motho!

⁷⁵ Mošomo ka moka wa topollo o tlide ka motho! Haleluya! Lehu le tla ka motho wa pele, Bophelo bo tla ka Adama wa bobedi. Le a bona? Ke lena bao, ga A dire selo gobane O be a swanetše go šomiša motho bakeng sa seo, gona O šomiša monna go lopolla morago gape. Kafao Bomodimo bo bile Jehofa, goba, Jehofa a be- . . . Yena ke Bomodimo, gomme O bile ngwa—ngwa

Ngwana. O tlie a ba ka sebopego sa sebe, gore A tle a lopolle modiradibe. Le a bona, fao go selo ka moka.

⁷⁶ Bjale, lebelelang ke eng... dimpho tšela di lekanela botse bjang ka go Jesu Kriste; le a bona, gauta, e bolela ka Bomodimo bja Gagwe. Bjale, ba be ba se bahetene. Ba be ba šušumeditšwe ke Modimo. Ba be ba sa eleletše selo se sengwe. Seo se netefatša thwi fao, le bona Babohlale, gore ba bone sa Kagodimogatlhago. Gobane mpho ya bona beng, yeo ba e neetšego, e tsebagaditše le go bolela gabotse ka bopaki bja bona gore ba bone Seetša sa Kagodimogatlhago. Gobane gobaneng? E bolela go phethagalala. Ba tlišitše *gauta*, “Bomodimo.” Ba tlišitše *seorelo*, “tirelo.” Gomme ba tlišitše *mira*, bakeng sa la Gagwe “lehu,” ge A be a le Lesea, amene, go bontšha gore Bomodimo bo tla bewa lehung ka nameng, amene, gore bo ke bo lopolle motho yo a welego. Batho ba ka kgona bjang go gana yeo?

⁷⁷ Ge le lemoga: Re dira eng fa? Re tšwa kae? Goba ke taba efe re nago go beng fa? Re be re se ra bewa mo feela ka mahlatse, re beilwe mo bakeng sa morero gomme re swanetše go direla morero woo. Eupša go le bjalo re morago godimo ga motheo wa tokologo ya kgetho moo re ka kgonago go O direla goba go O gana, feela boka Adama a dirile mathomong.

⁷⁸ Ke lebeletše, basetsana ba bannyane ba mo, Ngwanešu... Ke eng...? Ke a dumela ke mohumagadi yo monnyane o bapetše piano, gomme ke—ke be ke ba kwa ge ba opela. Re be re bolela ka bona, tseleng go tla fa. Go na le lapa le lennyane leo le gafetšego bophelo bja bona ka moka le se sengwe le se sengwe go Kriste. Lebelelang lapa lela, ka fao le lego taalong. Lebelelang bona basetsana ba bannyane. Ba be ba eme godimo mo, mo—mo mohlala wa bosadi bjo boswa, bja mengwaga ya mahlalagading. Gomme ga go kgathale...

⁷⁹ Dibeke di se kae tša go feta ke ile tlase ka gare boka... Ga ke tsebe se leina la lefelo le lego tlase fale, ka New York bjale, moo ba no go ba le poloko ya toropokgolo ya mahlaodi. Bjale, bona basetsana tlase fale ka—ka diaparo tša kaaparakatšwara gomme—gomme go se selo eupša ye nngwe ya dipikini tšela tše nnyane tša kgale, bjalo ka ge ba e bitša, godimo ga ntlhora ya yeo. Gomme, oo, feela mokgobok... Ba dira e ka ba eng yeo e lego monaganong wa bona, ga go kgathale se e lego, ke ka lebaka leo—lebaka leo ba lego mahlaodi. Ba ka no dira e ka ba eng. Ge ba nyaka go robala fase, ba se emelele, ba no robala fase gomme ba se emelele. Ge ba nyaka go ya, go dira selo se itšego, ba a se dira; ge ba sa dire, ga ba. Feel a, monagano wa bona o no sepela! Gomme ke eng se mogopol o wa go se sokologe o tlago go sona? Ga o na le tokel o ya go dira seo, ka baka la gore ga se wena wa gago mong; o rekilwe ke Bomodimo, Jesu Kriste, Morwa wa Modimo yo a dirilwego nama. Eupša, le a bona, tlhakahlakano ya sebe!

⁸⁰ Gomme le bona ba bannyane, basetsana ba baswa boka bao ba ema ntle; gobaneng, go nna, ke seetša mo nakong ya leswiswi. Ke seetša sa foroko, sa sefepi sa manyokenyoke sa Modimo, ka lefaufaung go bontšha go ka ba le Seetša! Go ka ba toko mo bogareng bja sebe!

⁸¹ Maria, mmago Jesu, ka toropongkgolo ya Natsaretha, toropokgolo ye botsebotse kudu e bego e le gona ka nageng, eupša go tšwa fao Modimo o kgethile mohumagadi yo monnyane go tswala Morwa wa Gagwe; sealamedi, popelo yeo e swanetšego go . . . Lesea le swanetše go tswalwa ka yona. O tšere motho yo bjalo go e dira. Modimo o šoma ka batho go lopolla batho. A ka kgona go go tšea, a šoma ka wena go lopolla batho, ge o ka gafela se sengwe le se sengwe o lego sona ka go felela.

⁸² Ge o le mosadi yo moswa, gafela maitshwaro a gago. Ge o le lesogana, gafela maitshwaro a gago, gafela monagano wa gago, gafela go nagana ga gago, gafela pelo ya gago, gafela soulo ya gago, gafela tšohle o lego! Gomme dumelela Kriste a šome ka seo. A selo sa letago! O ne dinoka go di tshela, o ne ma—ma maporogo go feta godimo, o ne—o ne lefelwana la meetlwa, o ne dikgwa, o ne dithokgwa, o ne mafelo a maso, o ne dithaba tša godimo, o ne manamelo a godimo. O dira eng? Letšatši le lengwe o tla swanela go ema le go lebelela morago, go bona mo o tšwago gona, gomme o ya go ahlolwa ka tsela ye o e tšeago. Bea tša gago—tša gago tšohle, monagano wa gago le dikgopolo tša gago, go Naledi yela ya Leboa (bogare bja Modimo) gomme o se šuthe go tloga go Yona. Dulang thwi le Yona. E tla go tliša ka go otloga boka E dirile Babohlale, thwi ka go lokologa go Kriste.

⁸³ Go lokile, ba Mo tloditše ka mira. Re hwetša bjale, ka go Johane 12:1 le 7, seo e no ba tlwa se A se dirilego. O be a le Mohlanka wa go phethagala wa Modimo, gomme o bile le Yena a tloditšwe ka dimpho tšohle tša Gagwe tše Kgethwa. O be a tloditšwe ka dimpho tšohle tša Modimo gobane O be a le Modimo. O be a le Modimo. Le a bona, ba Mo tlišeditše dimpho.

⁸⁴ Bjale, re tla ba . . . ke duma . . . Batho fa ka mehla, bontšintš bja bona, le a tseba, ba go romela se sengwe. Bjale, ge go etla morago go go romela morago, nka se kgone go e dira. Le a bona? Ke lefase tsekelele. Ke no se kgone go e dira. Gomme ke leboga tše nnyane . . . dilo tše dinnyane, le dilo tše batho ba di dirago go itlhagiša bonabeng le go leboga ga bona le go ya pele.

⁸⁵ Bjale, se ke se banna ba ba go huma ba se dirilego. Banna ba ke Babohlale, ba tlišitše gauta, gauta ya go seka. Ba tlišitše seorelo, se sekaonekaone ba kgonnego go se hwetša. Ba tlišitše mira, wo mokaonekaone wo ba kgonnego go o hwetša.

⁸⁶ Re lemoga godimo fa, ka go Mokgethwa Johane 12, re hwetša gore mosadi yo . . . ge nkabe re bile le nako go e bala, eupša ga ke nyake go le swarelela botelele kudu, le a bona, gobane ke tseba gosasa ke Mošupologo, gomme lena . . . ba bangwe ba

lena le swanetše go šoma. Lebelelang, ba tlišitše... Mosadi yo—yo o tlišitše mira wo, wola wa go tlotša wo mongwe wa go turwa, go tloša monkgo wa lehu. Gomme o robile lepokisi ūe la senkgamone gomme a le tšhela godimo ga hlogo ya Jesu. Gomme Judase o rile, “Gobaneng, se se swanetše go fiwa bahloki.” (O rile, “E sego gore o bile le tlhompho go bahloki, eupša o be a le lehodu le go thoma, o rwele tšhelete.”) Gomme o rile, “Se se be se swanetše go rekišwa, sebakeng sa gore se bea...”

⁸⁷ Gomme Jesu o rile, “Mo tlogele a nnoši! Gobane o dirile se...” O Mo tloditše, go poloko ya Gagwe. Le a bona? Mosadi yo, o lebogile kudu gore dibe tša gagwe di lebaletšwe go fihla a feditše tšhelete yohle ya gagwe a bilego le yona, gomme o tšere lepokisi la senkomonate le go se pšhatla gomme o tšhetše oli le go no nkgiša kamora ka monko o mokaone wa mira wo, gore o be a Mo tloditše bakeng sa lehu la Gagwe. Bjale, le a bona, o dirile tirelo a sa tsebe seo a bego a se dira, eupša o be a leboga Modimo kudu.

⁸⁸ Gomme ge o thabetše Krisemose kudu, ga se go re, “Ke—ke fa boJones mpho; gomme ba mphile e tee morago, ke tla bona se ke nago le sona mosong.” Gobaneng o sa bule pelo ya gago le go bona se se lego ka fale, wa hwetša ke eng o nago ka *fa*. Gomme wa amogela... ge re e hwetša e se na le selo, ka feela dithutotumelo tša nekethifi le—le—le matshwenyego a lefase, gobaneng o sa kgopele Kriste go e tlatša bošegong *bjo*? Bošegong *bjo*, gore le kgone go hwetša tlhaloso ya kgontha ya Krisemose. Ke—ke Kriste ka go lena; Modimo, a dula ka pelong ya motho. Seo ke se Krisemose ya kgontha e se rago.

⁸⁹ Eupša, le a bona, lehono re ba go nekethifi kudu. Ke diabolo a re tliša go kgabola kua, (fao go na le dikotanatša go pentwa tša pongpong, le kga—le kga kgamakgolo le mo—le mo monna wa ditedu, gomme a fofa go kgabola moyeng boka sefone, le go etela lefase ka moka le legae le lengwe le le lengwe le mokgobo wo monnyane wa dibapadišane mokokotlong wa gagwe, gomme o etela ngwana yo mongwe le yo mongwe) gomme e—e no ba maaka! E no ba, thwi ntle, maaka. Le a bona? Bjale, le a bona? Eupša gobaneng? Diabolo o dirile seo gore a kgone go phetla menagano ya batho.

⁹⁰ Lefase la kgwebo le tsene ka go yona gomme ba... Gobaneng, ba dira go lekanelka nako ya Krisemose go fihla ba kgona go khutša ngwaga ka moka, go nyakile. Ke boletše le rakgwebo letšatši le lengwe, o rile, “O mpha dibeke tše pedi tše, gomme ge ke be ke se ka swanela go boloka banna ba ka mo,” o rile, “ke tla leta go fihla Krisemose ya go latela; nka kgona go ya go thea dihlapi, e ka ba eng ke nyakago go dira, go fihla Krisemose ya go latela.” O rile, “Eupša ke swarelela bašemane ba sepela.” O rile, “Ke no ba boloka fa feela go lekanelka go boloka kgwebo ya ka e butšwe gomme e boloka—e boloka diatla tša ka

di lefetšwe le dilo.” O rile, “Ga ke dire selo go fihla—go fihla nako ya Krisemose e etla.” Le a bona, e fetogile selo se segolo sa kgwebo mola e swanetše go ba thapelo; borapedi.

⁹¹ Bjale, Modimo, o tloditše Jesu bjalo ka botlalo bja Yenamong go fihla . . . O be a le Mpho ya Modimo go lefase. Gore banna ba bohlale ba tsebišwa ka go hlaka, gore ba neela mpho ya bona go Yena; ba laeditše gore ka pelong ya bona ba tsebile O be a le mang, le se A bego a eya go ba direla sona. Kafao (ga go makatše) selo sa pele ba se dirilego, ba wetše fase, ka lenanegong ka phethagalo, gomme ba Mo lotšhitše. Pele ebole ba ka e kwešiša, ba wetše fase le go Mo lotšha gomme morago ba neela dimpho tša bona. Yeo ke tsela ya go ba le Krisemose ya kgonthē: go Mo lotšha, morago wa neela mpho ya gago; o neela mmele wa gago bjalo ka sehlabelo se se phelago, se sekgethwa le go amogelega go Modimo.

⁹² Eupša le a tseba ke eng, ka morago ga ge banna ba bohlale ba dirile seo? Tate le mmago Kriste . . . tate mohlokomedi (nnete) le mme gape, ka gobane Modimo o be a le bobedi tate le mme wa Gagwe. Eupša re hwetša gore ba amogetše dimpho tše go tšwa go banna ba bohlale. Ga go makatše ba be ba bitšwa banna ba bohlale. Ba be ba le bohlale. Ka kgonthē ba be . . . ba bile le bohlale. Ge batho lehono ba ka no ba bahlale bjalo, feela go hlalefa! Go tšeа monna yo bohlale go tla go Kriste. Monna yoo a Mo šotogelago ke monna a sego bohlale. Eupša go tšeа monna yo bohlale, go tla go Kriste.

⁹³ Bjale hlokomelang! Gomme ka morago ga nako yeo banna ba bohlale ba Mo tsebagatša se A tla bago, gomme re hwetša ka Lengwalo seo ke tlwa se A bego a le sona: Bomodimo mo tirelong bakeng sa lehu. Bakeng sa eng? Bomodimo ka go tirelo ya Modimo bakeng sa lehu. Jesu o be a le Bomodimo ka go tirelo bakeng sa lehu, go lopolla lefase. Eupša lefase le dirile eng go Bjona? Ba Bo ganne. Ba Bo latotše. Gobaneng? Ba bangwe ba bona, karolo ye kgolo ya bona, ba dirile seo ka gobane se: ka gobane O hwile! Ba rile, “O be a ka se kgone go ba Bomodimo gomme a hwa.” Motho (mmele) o be a se Bomodimo, eupša Bomodimo bo be bo le mmeleng. Mmele wo o swanetše go senyega. Yena Kriste yoo a lego ka go lena ke selo se nnoši seo se kgonago go le tsoša. Bjoo ke Bomodimo, Modimo ka go lena.

⁹⁴ Bjale, hlokomelang! Bjale, go swana le bjale, ba gana Bomodimo bjo bo tsebagaditšwego. A le a e hwetša? Ka kgonthē ba tla bea leina la bona go puku ya kereke le go re, “Ke tla leka go phela ka thutotumelo ye.” Ba tla tšeа keno ka se. Eupša ge go etla go amogeleng Bomodimo, le go hlagiša morago mohuta wa go swana wa mpho boka ba dirile . . . gore o tsebagatšwa ka mpho ya gago, gore o neela bowena bjhole bja gago go Bjona, go tsebagatša Bomodimo. Gona o itsebagatša wenamong le Bomodimo, ka go fa tšohle o lego, se o lego, go Bomodimo Yenamong.

⁹⁵ Bjale, Kriste ka go letšatši le, leo bjale re phelago ka go lona, e sa le Bom-...a itsebagatšago Yenamong: Bomodimo, magareng ga batho. O sa le Bomodimo, ka gobane ke Yena Lentšu. Gomme ge re bona Lentšu le phela Lonamong, gona re a tseba motho yola ga a kgone go dira seo. Ke Bomodimo, Lentšu le dirwa go bonagala ka motho. Gomme Jesu o rile ka Boyena, “Morwa ga a kgone go dira selo ka go Yenamong. Nka se kgone go dira selo, Ke nna Motho,” Jesu o boletše. “Eupša Tate wa Ka yo a dulago ka go Nna, O Ntaetša dilo tšohle tše Yenamong a di dirago.” Amene! Ke lena bao! Ke eng? Bomodimo bo tsebagatšwa ka go motho. Bjale, selo sa go swana se lehono; gore Bomodimo, Lentšu le le tshepišitšwego la letšatši le, le kgona go itsebagatša Lonamong ka go wena. Amene! Gona neela ka moka tša gago go Lona. Bontšha gore o dumela go Lona. Le fe Bomodimo: Le dumele, tirelo, gomme o be komana go hwa ntle go wenamong le menagano ya gago mong. Eupša lehono Le gannwe bjalo ka ge Bo bile nako yela.

⁹⁶ Hlokamelang, Modimo o ile a hlahlal Babohlale le tšona dimpho. Ka kgonagalo mengwaga ye mebedi, ba latetše Naledi yela. Le a bona? Gomme seo se laetša gore E ka se kgone go ba se tee sa dilo tša tlhago tše di diregilego. Le a bona? Gobane ge dinaledi, di tshela diopiti tša tšona, di ka be di putlile, go tla bontšha go be go le se sengwe go fapana. Ka gobane...ntle le ge Babohlale bale ba E bone, nako ye telele pele e direga, gomme ba tsebile ba ile ba swanelo go putla tsela yela; le a bona, ka ditseleng ba bego ba etla ka go tšona. Gomme ba kgabagantsše feela ka Bethlehem ka nako yeo, ba thoma go tloga godimo kua, pele ga fao, go tseba gore mebele ye ya legodimo e be e sepela ka tsela yeo.

⁹⁷ Bjale, Modimo o hlahlile Babohlale gobane ba bile le dimpho tša maleba. Modimo o hlahlile banna ba bohlale ba ka gobane ba bile le mpho ya maleba e tsebagaditšwego go tsebagatša Morwa wa Gagwe. Oooooo, nna! A le a e hwetša? Banna ba bohlale lehono, ba tsoga ka Leina la Morena, e sego ka se sengwe sa go boikgopolelo tsoko, eupša ka mpho ye Modimo a e tshepišitšego letšatši le, gomme Modimo o tla le hlahlal go tsebagatša gore Jesu Kriste o a swana maabane, lehono, le go ya go ile. Ke lena bao: banna ba bohlale!

⁹⁸ Modimo o hlahlile dimpho tšela gobane di be di le dimpho go Mo tsebagatša. Banna ba bohlale, lehono, ba ba ka kgonago go lebelela kgole le bokereki le dilo tšohle tša lefase, go Lentšu la Modimo le le Phelago! Gomme Modimo o tla tsebagatša Morwa wa Gagwe ka Lentšu la Gagwe, gobane Seo ke se A lego. “Nna le Tate wa Ka re batee.” Gomme, “Mathomong go be go le Lentšu, gomme Lentšu le be le le go Modimo, gomme Lentšu e be e le Modimo. Gomme Lentšu la dirwa nama gomme la dula magareng ga rena.” Gomme Lentšu la go swana lehono, O a swana maabane, lehono le go ya go ile. Gomme monna yo bohlale

o latela Leo, gobane Leo ke se Modimo a se hlokamelago go itsebiša Yenamong ka Lona. Amene! Mpho! Ya kgonthe, mpho ye e tsebagaditšwego ya Modimo, Modimo o e tliša godimo ka se sengwe le se sengwe boka seo, go itsebagatša Yenamong ka yona.

⁹⁹ Gomme ke ka fao Kriste a tsebagaditšwego: ka gauta, mira, le seorelo, ka bona banna ba laetšapele le go laetša ka sekai se bophelo bja Gagwe bo bego bo swanetše go ba sona. Le a bona? Bomodimo bo bonagaditšwe bakeng sa tirelo, go hwa gore A ke a lopolle setšhaba, gobane O be a swanetše go “phološa batho ba Gagwe sebeng sa bona.” E sego go phološa lefase, go phološa batho ba Gagwe go tloga sebeng sa bona. Beibele e boletše mo, “Ka gore Bantle ba tla tshepela ka go—ka go Leina la Gagwe.” Le a bona? Bantle ba tla tshepela ka go Leina la Gagwe. Amene! Ka mantšu a mangwe, Monyalwa, *mmilešwantle* wa Bantle, o tla be a tshepetše ka go Leina la Jesu Kriste, “Bantle ba tla tshepela ka go Leina la Gagwe.” Bjale, Modimo o ba hlahlile, ka gore ba be... dimpho tšebo ba bego ba di fa, di be di swanela nako.

¹⁰⁰ Hlokamelang! Bjalo ka ge ke boletše, Modimo o... O—O aragogantše Lentšu la Gagwe mathomong, ka go Genesi. Nka kgona go tsea Genesi le go le laetša lebaka le lengwe le le lengwe ka Beibeleng, tlase go lebaka le mo. Ditumelothoko tšohle le dilo re nago natšo lehono, nka kgona go le laetša tlwa mo di bego di le ka go Genesi. Le a bona?

¹⁰¹ Modimo o file Lentšu la Gagwe bontši *fa*, bontši kudu *fa*, bontši kudu *fa*, go lebaka le lengwe le le lengwe. Gomme ka gona O rometše moprofeta tlase, a tloditšwe go dira Lentšu lela le phethagale, gomme le thekga yo mongwe yoo a bego a etla. Le a bona, boka Mesia, ka mehla o thekgile. Moprofeta yo mongwe le yo mongwe ka bophelong bja gagwe mong, boyena bja gagwe mong, Lentšu leo le filwego bakeng sa letšatši lela, o tlie gomme a phethagatša Lentšu leo le ngwadilwego gomme a bolelelapapele seo yo mongwe yo motee a bego a eya go ba sona. Gomme yo mongwe le yo mongwe wa bona o boletše ka Yena (amene) gobane O be a le bottlalo, O be a le Hlogo ya baprofeta, O be a le Lentšu la Modimo, O be a le baprofeta. Amene! Yena šoo. Hlokamelang! O be a makatša bjang: yo mongwe le yo mongwe wa baprofeta bale.

¹⁰² Ka gona ge A etla, O be a le bottlalo bja baprofeta ka moka, bo bonagaditšwe; ka gobane ba be ba le Lentšu la Morena, gomme O boletše Yenamong, “Ge le bitša bale badimo, bao Lentšu la Modimo le tlago go bona, le ka kgona bjang go Ntshola ge Ke re ‘Ke nna Morwa wa Modimo?’” Le a bona, ebile bale ka go lebaka lela ba tsebagaditšwe bjalo ka badimo, Modimo o ba biditše, Yenamong, “badimo.” Ba be ba le eng? Ba be ba le diponagalo tša Lentšu la Gagwe. Gomme šo Yena o be a le, bottlalo bja Lentšu, Bomodimo mmeleng, Bomodimo bo bonagaditšwe nameng.

¹⁰³ Šetšang! Ka gore dimpho tše, tšebo banna ba ba di tlišitšego, ba be ba ka se kgone go tliša tšebo go moprofeta. Go ka be go se

gwa loka. Le a bona? Tšona dimpho di be di ka se kgone go ya go Eliya, ba be ba ka se kgone go ya go Moshe, ba ile ba swanela go tla go Yena. Gomme go beng dimpho tšela di be ka kgagamalo di lebane le letšatši lela, gomme di le go tsebagatša O be a le Mang ka dimpho tše, gona mo go tla Modimo mmogo gomme a Mo šireletša. Gomme a di boloka, mengwaga ye mebedi tlase kua, go fihla di hwetša Seetša sa go Phethagala. E swanela bjang!

¹⁰⁴ Selo sa go swana lehono. Re na le batho ba ba nogo go botega, batho ba bakaone, batho ba mmapale. Eupša, le a bona, ka go seo, fao go ya go ba selo se sengwe se tlago pele, seo Modimo ka mehla a se dirilego, go tsebagatša letšatši le. Le ke letšatši ge dilo tše di bolelwa go direga. Go ka se be ba bantši, feela kudu, ba sego nene kudu bao ba tla phološwago. Beibele e boletše bjalo. Go tla no ba le go tlala seatla.

¹⁰⁵ Jesu o boletše Yenamong, "Bjalo ka ge go bile matšatšing a Noage, fao disoulo tše seswai di phološitšwego." Disoulo tše seswai, go tšwa go mo—mo moloko o swantšhwago le wo. "Bjalo ka ge go bile bjalo matšatšing a Noage." E be e le eng? Ba bagolo, batho ba go aagega, bašomi ba bagolo, baagi ba bagolo, se sengwe le se sengwe bjalo ka ge ba bile. Ba dirile tlhabologo ye go no swana le yona, dilo tše kgolo tšebo ba bilego natšo. "Gomme bjalo ka ge go bile matšatšing a Noage, kafao go tla ba bjalo ka go tleng ga Morwa wa Motho." Le a bona? Gomme Modimo o bile le Noage go tsebagatša Lentšu la Gagwe le le tshepišitšwego. Go be go swanetše kudu. Areka e be e swanela Lentšu la Modimo le a le boletše, gore O tla senya motho. Eupša o phološitše se a bego a ka kgona.

¹⁰⁶ Bjale, banna ba bohlale ba, ba tliša dimpho tša bona, ba tsebagaditšwe. Dimpho tša bona di tsebagaditše se E bego e le sona, gomme ke ka baka leo Modimo a šireeditšego dimpho tšela go kgabola mosepelo wo mongwe le wo mongwe ba o dirilego. O Le šireeditše go fihla ba fihlile ka dimpho tselia, gobane di be di swanela nako. A kereke ya ka e kwešiša seo? Ke se se diregago bjale! Ke a holofela ga se godimo ga hlogo ya gago. Ke swanetše go e bolela ka seswantšho, go nyakile, le a bona. Eupša a le a bona? Ke dilo tše di diregago di swanela letšatši le, Laodikia. Ke nako ya go swanela, ke ka baka leo Modimo a E šireeditšego. Le a bona, o E tlišitše thwi go kgabola go itsebagatša Yenamong. Dimpho, le ge di hlotše lehu, e beile kotanatšhtišo tseleng ya bona. Ke nako ya go swanela, yeo ke nnete, e swanela letšatši. Ke ka baka leo Modimo a E šireeditšego, ka tselia ye A dirilego. O tla E šireletša, go fihla morero wa Gagwe o hlanketšwe.

¹⁰⁷ Oo, ke badile kanegelo, e tla monaganong wa ka e sego telele go fetile, ya se sengwe ka mokgwa woo. Go be go tla ba toropokgolo ye kgolo, mo ka setšhabeng se, le... New York. Gomme e be e le thapama ya Krisemose. Gomme go be go le lapa la go šokiša. Tate yo monnyane wa go tšofala, o be a na le TB, gomme o be a... gomme mosadimogatša wa gagwe o be a na le

TB. Ba be ba le babotlana. Gomme o—o mohuta wa... O be a fokola gomme kafao ga go yo a bego a ka mo hira. O be a se ne thuto, gomme o—o... batho ba be ba sa mo nyake.

¹⁰⁸ O be a no ba molahlwa, o bile modulatseleng. Feela... le tseba se modulatseleng a lego, go no ya le—le go topelela se sengwe, le go se rekiša gomme a hwetša se a kgonago; letseno le lennyane leo ba le dirago ka sona, ba leka go iphediša. Feela... boka morkiši goba se sengwe, mo mokgotheng; go ya go reka diphini tše rilego le dinalete le dikhurumelo, le e ka ba eng ba kgonago. Le—le go e tsea, gomme—gomme mohlomongwe go reka phakete bakeng sa peni, le go di rekiša ka nikele; le go dira disente tše nne go phakete, gomme mohlomongwe mo letšatšing. O re, “Yeo ke—yeo ke thomo ye kgolo.” Eupša e no nagana, ka moka tše a ka di rekišago ka letšatši. Mohlomongwe go dira masomepedi, disente tše masometharo ka letšatši, gomme o be a na le lapa.

¹⁰⁹ Gomme mo—mo mosadimogatša yo monnyane, a fokola, o—o hwile.

¹¹⁰ Gomme go be go etla nako ya Krisemose. Gomme mosetsana yo monnyane, o be a godile... go tšwa go phepopme, a se ne dijо tša maleba le selo; o tsenwe ke TB, le yena. Gomme o be a le moisa yo monnyane, gomme a ka ba seswai, bogolo bja mengwaga ye senyane, lesome. Gomme ga se nke a ke a ba le mpopiana wa Krisemose. Gomme seo ke se a bego a se nyaka bakeng sa mpho, e be e le mpopiana.

¹¹¹ Gomme tate, a sa kgone go mo fa šedi ya dihlare le go ya pele, o bile... o—o bone mosetsana yo monnyane a eya ka lebelo, gomme o lekile bokaonekaone bja gagwe go—go—go hwetša tšelete ya go lekanela mmogo go mo hweletša mpopiana wa Krisemose; ge a ka no hwetša go lekanela go mo rekela mpopiana wo monnyane! Gomme kafao nako ya Krisemose e be e batamela, boso bjo bobe bo tsene ka gare, mosetsana yo monnyane o bile le mohuta tsoko wa nyumonia, gomme—gomme o hwile, feela dibike di se kae pele ga Krisemose. Gomme tate, ka nnete, pelo ya go robega, o ile go thini ye nnyane ya gagwe le go ntša tšelete. Gomme o naganne ka mosetsana wa gagwe yo monnyane, gomme o nyakile mpo—mpo mpopiana boka basetsana ba bannyane. Le a bona, ke mme yo monnyane a tlago pele.

¹¹² Le hlokomela ka fao mosetsana yo monnyane, o ya go mpopiana, ka gore o... yeo ke tlago ya gagwe, ke—ke mme yo a tlago. O tla ba mme letšatši le lengwe ge a phela le se sengwe le se sengwe. Le a tseba, tlago ya gagwe. Ke ka baka leo mosetsana yo monnyane o rata mpopiana wo monnyane, o nyaka go o hlokomela; gobane golebjalo, ke—ke yo monnyane, ka kgonagalo, m—m—m mme yo monnyane.

¹¹³ Gomme o be a nyaka mpopiana wo monnyane, gomme o be a se a ke a ba le o tee. Gomme Papa o be a bolokile se sengwe le se sengwe a bego a kgona go—go mo hweletša mpopiana wo monnyane. Gomme, kafao, o hwile.

¹¹⁴ Gomme tate o bile mohuta wa go ba le go šitega ga monagano. Mosadimogatša wa gagwe o be a tšerwe, mosetsana wa gagwe yo monnyane, gomme monagano wa gagwe ka mokgwa wo mongwe o fihlile lefelong go fihla a—a... go le bjalo o be a—o be a eya malaong bošego bjo bongwe le bjo bongwe le go bolela le mosetsana yo monnyane yo, le ge a be... a bolokilwe. Eupša o naganne o be a—o be a bolela le yena, gomme a mmotša, “Bjale, Hani, e ka se be botelele, gomme Papa o ya go go hweletša mpopiana wo bakeng sa Krisemose. Gomme—gomme Papa o go tshepišitše mpopiana, gomme ke—ke—ke ya go o hwetša.”

¹¹⁵ Mafelelong, Krisemose e fihlile. Gomme, nnete, le tseba ka mo go lego. Bahumi ba bile le diphathi tša bona—tša bona tše kgolo; le—le dikerese di eswa, le mašabašaba a magolo a godimo ka dikerekeng, le go bolela ka Jesu le—le go ya pele (dikereke di bile), le go ya go kgabola mehuta yohle ya metlwae ya mesa, le go opela, le dikherole le se sengwe le se sengwe. Gannyane ba be ba sa tsebe se se bego se direga morago ka mokgobeng, ka morago ga sohle se.

¹¹⁶ Moisa yo monnyane yo morago kua, gomme o bile go hlanya. O nyakile mosetsana yola yo monnyane go ba le mpopiana wola gampe kudu, ka gobane o be a kgopetše mpopiana wo monnyane wo. Ka fao a ya ntle gomme a mo rekela mpopiana wo monnyane wa lešela, selo se sennyane—se sennyane, go molaleng e ka ba disente tše masometharo; selo se sennyane sa ditšila a se rekilego, tlase ka lehlakoreng la mokgotha. Gomme e be e le bošego bja go tonya ka kgonthe, di—di—di diphefo tša ledimo di tšutla, lehlwa le ewa thata fale; gomme New York, thwi mo lebopong.

¹¹⁷ Gomme mekgotha e tlala; gomme batho ka go tša bona tše kgolo, dikoloi tše kgolo tša limosini. Gomme diphathi tša botagwa, ntle go nwa, mokete wa matswalo a Kriste le wa dilo tše re bolelago ka tšona bošegong bjo, go leka go nagana gore yeo ke tsela ya maleba go e dira; ba no nwa go tloša mahloko a bona a kgale le dilo, gomme yeo—yeo ke tsela ya go e dira. Bona bohole...

¹¹⁸ Ke eme ka lebenkeleng, letšatši le lengwe, gomme mosadi a bolela ka eng... basetsana ba babedi ba kopane gomme ba nyakile go tseba ke eng ba se swaretšego papagobona. Gomme yo mongwe wa bona o rile, “Gabotse, o...” O mo hweleditše khathuni ya mohuta wo itšego wa disekerete. Gomme yo mongwe o rile o mo hweleditše sa bohlano sa wisiki le—le—le mokgobo wa dikarata. Bjale ge seo e se go fe mpho ya segopotšo bakeng sa tswalo ya Morena Jesu Kriste! Gomme yeo ke tsela ye e yago,

le a bona, e no ba sehlopha se segolo sa magadigadi. Ga e ne Krisemose ka go yona le gatee.

¹¹⁹ Gomme kafao re a hwetša bjale, monna yo monnyane yo, o seselletše mmogo. Gomme o tsebile ka pelong ya gagwe mosetsana wa gagwe yo monnyane o be a ile, eupša o ile le go reka mpopiana go le bjalo. Gomme a gopola, “Ke tla no thoma go sepela, ke tla mo hwetša felotsoko. O tla be a le go bapa mokgotheng fa gomme ke tla mo hwetša.” Gomme o thomile go sepela.

¹²⁰ O—o be a sa kgone go itlatliša yenamong, o be a se morago fale ka go mokhukhwana wo monnyane le ka go a mannyane, a makgwakgwa, malao a ditšila; eupša, o bolokilwe. Kafao, o—o tsebile. O naganne o tla mo hwetša mo mokgotheng. O rile, “Ke tla no tšwelapele go sepela.” Gomme o be a eya tlase go kgabola mekgoba, ge ba be ba opela dikherole tša bona le go ya pele. Gomme go theoga mokgoba, a phathekgle wo monnyane wo, mpopiana wa ditšila; a o swere ka jaseng ya gagwe, godimo go pelo ya gagwe, a nagana ka mosetsana wa gagwe yo monnyane.

¹²¹ Gomme mafelelong lephodisa le diregile go mmona, gomme lephodisa le swere mahlo a tšhipa lonamong, gomme a kitimela ka mokgobeng gomme a swara mokgalabje gomme a mo retolla go dikologa. O rile, “Ke eng se o se dirago o tsekella mo?”

¹²² O rile, “Ke iša mpopiana wo monnyane wo, mohlomphegi, go mosetsana wa ka yo monnyane.”

¹²³ O rile, “Gabotse, o dula kae?” Gomme o mmoditše moo a dulago. O rile, “Gabotse, o ya kgole go tloga lefelong leo, o tagilwe. Eya morago ka tsela ye nngwe.”

¹²⁴ O rile, “Mohlomphegi, ga se—ga se ka tagwa. Ke tshepišitše mosetsana wa ka yo monnyane ke tla—ke tla mo hweletša mpho ya Krisemose.” Gomme o rile, “Mpho ya maleba go mosetsana yo monnyane ke mpopiana wo monnyane.”

¹²⁵ Gomme o rile, “A nke ke e bone.” Kafao o mmontšitše wo monnyane, wa ditšila boka, mpopiana wa lešela. Gomme o be a o swere ka go ya gagwe... .kgauswi le sehuba sa gagwe, a swere mpopiana wo monnyane ge a... .Kafao lephodisa, la go swara mahlo a tšhipa, lonamong, la mo kgoromeletša pele le go thoma go theoga. Mokgalabje o ile go theoga mokgobeng, gomme lehlwa le ewa ka lebelo.

¹²⁶ Gomme, gabotse, diphathi tša bošegogare di thomišitše. Mosong wa go latela, lehlwa le be le hlephišitše, letšatši le be le tlie ntle. Gomme kafao ba swanetše... .batho bohle go tloga go diphathi tša bona tše kgolo tša maemo e be e le... .mekotla ya aese godimo ga dihlogo tša bona, go tšwa go go nwa mo gontši le mokete wa ma—ma matswalo a Kriste. Gomme—gomme bontši bja bona ba be ba le makgwakgwa go tšwa goyeng pele, go tloga go go ya pele gohle.

¹²⁷ Eupša tlasetlase ka mokgobeng, ba hweditše mokgalabje. Gomme ge ba mo phethotše, o bile le mpopiana wo monnyane kgauswi le pelo ya gagwe. Ke a nagana o išitše mpho ya gagwe go yena. O mo hweditše ka Nageng e sego fa. O—o—o išitše mpho. È be e le mpho ya maleba. (Modimo, kgaogelo.) Efela e mo tserere lehu la gagwe. Ga go tsela ye nngwe ka lefaseng a ka bego a mo file mpho, o be a bolokilwe. Eupša tsela e nnoši a ka kgonago go e dira, e tla ba go ya ka mokgwa woo. Mpopiana wo monnyane ga se o re bontši kudu, ke a thanka, mpopiana wo nnyane wa sefahlego sa ditšhila, eupša o...o o dirile eng? O phethagaditše tshepišo a bego a e dirile. Ga go tshwenye se batho ba nagannego ka ona, diatla tša gagwe tša ditšhila go wo monnyane, mpopiana wa ditšhila, eupša o—o phethagaditše tshepišo go mosetsana wa gagwe yo monnyane.

¹²⁸ Dinako tše dingwe ba lebelela godimo ga Ebangedi bjalo ka go opela, go bapala, ba be ba sa E nyake ge Modimo a E tlišitše, eupša e phethagaditše tshepišo gore O tla fa Morwa wa Gagwe. Gomme le a tseba ke eng? Ba Mo tlogetše go hwa, le bona, feela boka modulatseleng mo mokgotheng. Yeo ke nnete tlwa, ba Mo tlogetše go hwa boka modulatseleng mo mokgotheng. Gomme lehono ba Mo swara bjalo ka modulatseleng mo mokgotheng, eupša O phethagaditše se A bego a swanetše go se dira. O be a le Mpho yeo Modimo a e tshepišitšego go lefase.

¹²⁹ Bošegong bjo, a nke ke Mo tsee bjalo ka Mophološi wa ka go pelo *ya ka*. A nke ke sepele ka sefahlegong sa lehu la ka, goba e ka ba eng se lego, boka seo. Ke tshepišitše bophelo bja ka go Yena. Ke nyaka go bo iša go Yena. Ga go kgathale se ke swanetšego go ya, ge eba ke swanetše go ya go kgabola lehu, ge eba ke swanetše go thunywa; ga go kgathale se se diregago, ke swanetše go segwa, go bitšwa “segafa,” se sengwe le se sengwe, go rakwa go tšwa go dikereke ka moka tša Bokriste le go ya pele, ke...ke mpho ya Modimo yeo ke e swerego ka pelong ya ka. O e file, ke nyaka go e iša go Yena.

A re inamišeng dihlogo tša rena feela nakwana.

¹³⁰ Dimpho tša maleba ke bolelago ka tšona, e be e le mpho ya maleba gobane mosetsana yo monnyane... o be a le mosetsana yo monnyane, go ba, mme yo monnyane (nkabe a bile), mpho ya maleba e be e le mpopiana wo monnyane. Mpho ya maleba yeo Modimo, Mohlodi, a kgonnego go e fa tlholo ya Gagwe, e tla ba Mophološi go e phološa go tšwa seemong se e bego e le ka go sona. Ke a makala, bošegong bjo, ge re batamela Krisemose bjale, gomme ke a nagana e tla ba molaetša wa mafelelo re o kwago gare ga wona bjale le Krisemose, ntle le ge re ka hwetša molaetša wa seyalemoya wa yo mongwe.

¹³¹ Ke a makala, bošegong bjo, ge eba re amogetše Mpho yeo Modimo a re tshepišitšego: Bophelo bjo Bosafelego, go dumeleng go Kriste le go amogela Moya wo Mokgethwa. Ge o se wa ke, o

tla rata go amogela ya Modimo ya nnete, mpho ya therešo ya Krisemose, a o ka phagamiša seatla sa gago? E re, “Ngwanešu Branham, ga—ga ke tsebe, dinako tše dingwe ke—ke E dumetše. Gomme ke šeditše dilo tše ke di dirago. Gomme ka mokgwa wo mongwe, gannyane nthatana, ka pelaelo.” Le se ke—le se ke la belaela gape, bagwera.

¹³² Le a bona, go—go thari kudu go ya go belaele bjale. A re beng kgontha ka yona. E re, “Nthapelele, Ngwanešu Branham, gomme ke nyaka go... Mpho ya Modimo go lefase, ke Jesu Kriste. Ke—ke—ke nyaka ye go ba Krisemose ya kgontha. Ke amogela Moya wo Mokgethwa ka pelong ya ka. Wo o ka kgonago go mpepula go kgabola madimo ohle a bophelo, gomme letsatši le lengwe nka kgona go tla ka Bogeneng bja Gagwe le mpho ye ya Bophelo bjo Bosafelego. O tla nkamogela godimo ga motheo woo, yeo ke tsela e nnoši A tla e dirago.”

¹³³ Goba, a le na le mpho ya maleba bošegong bjo? Mohuta wa mmakgontha wa mokgwatebelelo? “Tate, ke tla Go latela e ka ba kae O yago. E ka ba eng O rego ‘Dira,’ ke tla e dira. E ka ba eng Lentšu la Gago le rego go nna, ‘Dira,’ ke tla e dira. Ee, Mohlomphegi, ga ke kgathale se yo mongwe le yo mongwe gape a se bolelago, ke ya go e dira gobane ke nyaka Mpho ya Gago; ke Bophelo, gomme Kriste ke Lentšu.”

¹³⁴ Ge o sa kgone go dumela Lentšu lohle, gomme wa re, “Gabotse, ga ke tsebe, ke—ke dumela gore... se, ke dumela seo, eupša nka no se kgone go ya se, nka se kgone go ya sela.” O boka bamasomešupa bao ba tlogilego. Ga ba kgone go amogela Lentšu lohle le go amogela Kriste ka botlalo bja Bomodimo bja Gagwe le tirelo ya Gagwe; le go lokela go hwa bjalo ka ge A go diretše.

¹³⁵ Gona a o ka no bea seatla sa gago godimo, ka hlogo ya gago e inamišitšwe, gomme wa re, “Nthapelele”? Modimo a go šegofatše. Gomme Modimo a go šegofatše. Modimo a go šegofatše. Modimo a go šegofatše, mosetsana yo monnyane. Oo, Modimo a go šegofatše. Ee, ke bona seatla sa gago. Morena a go šegofatše, kgontha. Mpho ye nnyane ye, ya Kriste, yeo Modimo a e rometšego lefaseng; gomme a E tsebagatša ka... Babohlale ba E tsebagaditše, bophelo bja Gagwe Mong bo E tsebagaditše, lehu la Gagwe le E tsebagaditše, Tsogo ya gagwe e E tsebagaditše, go amogela ga gago go E tsebagaditše, gomme O itsebagatša Yenamong le wena gore ke wena wa Gagwe gomme Yena ke wa gago. Ge ka kgontha o se... le a bona, go arabela ga Moya wa Modimo go šoma ka go wena, ka go sehla se sa Krisemose, a nke e tle go lena bjale.

¹³⁶ Tate wa Legodimong, ge re thekesela boka modulatseleng mo mokgotheng, ga a gona a bilego le mošomo wo itšego go yena. Lefase le ile thwi pele ka go meketeko ya bona ya bošilo, kafao ba bjalo bošegong bjo, Morena. Eupša dinako tše dingwe re ikwela boka modulatseleng yola, eupša re amogetše Mpho. Kafao re a

rapela, Tate, gore O tla re dira mpho, ya seetša, go lefase le le hwago. Ba bantsi mo ba emišitše diatla tša bona gore ba nyaka Mpho ya Modimo gore O be a swanetše, ka Boyena, go fa Morwa motswalwanoši wa Gagwe, a tla fase, a ba Motho. O ikišitše fasefase ebole ga se ba... O tlie fasefase le go kokobela kudu go fihla ebole ga se A—A ba le malao go tswalelwka go ona. Kgo—kgo—kgo kgomo e be e swanetše go... goba pere goba se sengwe se be se swanetše go fa legopo la sona, sa tepogela ka thoko, (phoofoolo) batho ba be ba tlie bjalo ka seemong se bego se le. O—O tlie fase ka go—ka legopong, setala se sennyane sa kgale sa lewa ka lehlakoreng la thaba kua ka Bethlehem, moo morwa wa mmalegogwana a thomilego toropokgolo ye nnyane mengwaga ye mentši pele.

¹³⁷ Gomme bjale, Morena, re hwetša gore bošego bjo bongwe, bošego bja go tonya, go boletšwe go Yena, “Rabi, re nyaka go ya gae le Wena bošegong bjo.”

¹³⁸ Gomme O rile, “Gabotse, bjale, dinonyana di ne dihlaga, gomme—gomme diphukubje di ne molete, eupša Nna—Nna—Nna ga ke na... ebole lefelo go latša hlogo ya Ka.” Gomme ke ka tsela yeo ba Mo lesitšego a hwe, boka modulatseleng mo mokgotheng.

¹³⁹ Tate wa Legodimong, a mo—mo Mokriste a ka kgona, a batho lehono ba kgona go bona gore—gore Yeo ke Mpho ye kgolo yela? Gomme bontši mo, bošegong bjo, go feta tasene, ke a thanka, ba emišitše diatla tša bona gore ba be ba nyaka go amogela Moya wo Mokgethwa. A nke fao go no swana le banna ba bohlale, mohlomongwe ga go le o tee wa phuthego yohle ebilego a tla bonago se se diregago. Gomme Naledi ye, Seetša se sa sephiri se fetile godimo mabogatsalefaufau, lebaka la mengwaga ye mebedi, moo batho ebole ba bolokilego nako yeo ka dišupanako tše nne, ba bolokile nako ka dinaledi. Ga go yo motee, ga go rahistori a ngwadilwego ka yona. Ga go yo motee a tsebilego selo ka Yona, gomme efela E be le le fao. Gomme banna ba bohlale ba, ka mpho ya bona ya maleba, ba ile ba hlahlwa thwi go kgabola go ya go Yona. A nke Seetša sela sa go swana se tle ka pelong ye nngwe le ye nngwe, fa bošegong bjo, yeo e dutšego bjale. Go ka no se be khuduego, go ka no se be le *se, seo*, gomme mohlomongwe ga go yo mongwe gape a tla e tsebago, feela boka banna ba bohlale. Eupša a nke se sengwe se agele kudu ka go banna ba, basadi, bašemane le dipelo tša basetsana bošegong bjo, gore Mpho yela ya Modimo e tla tlotša bophelo bja bona. Gore go tloga bošegong bjo go ya pele, ba tla fetolwa. Ba ka se sa ba boka ba be ba le. Ba tla ba se—se sebopiwa sa go fetolwa go tloga bjale go ya pele. A nke bona, bjalo ka banna ba bohlale, ba retologe ka thoko gomme e sego go ya morago go difešene tša lefase (le Herode, paleisi ya kgoši), “Eupša ka go sebotšwa ke Modimo, ba retologetše thoko.” E fe, Morena.

¹⁴⁰ Bošegong bjo ke a rapela gore monna yo mongwe le yo mongwe yo bohlale, mošemane, goba mosetsana, ka mo bošegong

bjo... Monna goba mosadi yo a lego bohlale go lekanelo go retologela ka thoko go tloga go dilo tša lefase bošegong bjo, ba se sa ya morago gape ka morago ga letšatši le. Ka morago ga fa—fa go feta ga letšatši le le bošego, ga ba sa tlo ya morago go dilo tša lefase, eupša a nke ba be bohlale. Gomme Segalontšu se sennyane se sa sephiri seo se ba dirilego go phagamiša seatla sa bona le go re, “Ee, ke nyaka Mpho ya Modimo...” A nke selo sela sa go swana seo se ba dirilego go phagamiša seatla sa bona, se ba tsebagatše bošegong bjo le lehu la Gagwe, poloko, le tsogo, ka go ba fa Moya wo Mokgethwa. A nke ba retologele ka thoko.

¹⁴¹ A nke basadi ba mo bošegong bjo, Morena, bao ba bilego le nako ye thata go ipoloka go swana le lefase; ba tlogela moriri wa bona o gole, le go apara sehumagadi, le go tloša meikapo wo le dilo, maitirelo a, seo se laetša... e—e mohuta wa go ba tsebagatša gore ga ba phelega, ba...fao—fao go na le selo se sengwe sa phošo. Gomme a nke bošegong bjo, Seetša se sennyane se sa sephiri, Morena, seo se ba dirilego go phagamiša diatla tša bona, a nke ba re, “Morena, ke retologela ka thoko go tloga go dilo tša lefase, bošegong bjo.”

¹⁴² Monna ba bao ba sa nkago ba ba le se—se—se sengwe sa kgonthé, ba ba tla bolelago le basadibagatša ba bona le go ba dira go retologela ka thoko; le dilo tše ba di dirago. A nke bohle re be mmogo, Morena, re no retologela ka thoko bošegong bjo, go sebotšwa ke Modimo ka molaetša wo monnyane wa go makatša wa se—se Seetša sa Modimo seo se bethago godimo ga dipelo tša rena. A nke re retologele ka thoko bošegong bjo gomme—gomme re phelele Wena matšatši a rena ka moka, re ye—re ye gae le Wena ka tsela ye nngwe go feta ye re bego re e sepela. E fe, Morena. Re dire Bakriste ba bakaone, Mokriste yo mongwe le yo mongwe mo bošegong bjo, Tate, yo a Go amogetšego gomme a dumela go Wena. Gomme ba lekile go phela bophelo bja Bokriste, eupša bošegong bjo, a nke ba retologele ka thoko, a nke ba amogelete Mpho yela.

¹⁴³ O Modimo, ke—ke—ke tsela ya go nyatšiwa. Basadi ba tla bitšwa “fešene ya kgale,” ba tla bitšwa se sengwe le se sengwe. Gomme banna ba tla bitšwa “mahlanya.” Eupša re—re komana, Morena.

¹⁴⁴ Moya wo Mokgethwa, re retollele ka thoko, gonabjale. Nthetollele ka thoko, Morena. Ga—ga—ga ke nyake le go ya ka tsela ye nngwe ye e ka ntlhahlelago kgole go tloga go Wena. Morena, ke—ke nyaka go ya feela ka tsela ye O nyakago ke eya. Ke nyaka mpho ya pelo ya ka go phethagala kudu gore e tla Go tsebagatša, Morena, mo lefaseng, gore Wena ga se wa hwa, O a phela.

¹⁴⁵ Wena o Modimo wa ba phelago, e sego Modimo wa bahu. Bahu ba khupeditšwe gohle ka dintšhi, le dintšhi tše tala, go hlola ditwatši le tše ntši tše tala; go swana le monna yo a

tšeago seno sa gagwe sa mathomo, o kgoga sekerete sa gagwe sa mathomo, o bolela maaka a gagwe a mathomo, go ya ntle go mosadimogatša wa gagwe lekga la pele; goba mosadimogatša yo a yago ntle go monnamogatša, goba a dira dilo tše di fošagetšego; fela boka ntšhi ye tala e ba lomile, gomme e...di—di ata ka... di rotoga ka maraga le tšhila, ka gobane e godimo ga soulo ye e hwilego ka gare. Meboya ye mebe e tšwa go yona. Gomme moyo wo motee wo mobe o mo dira go dira se sengwe gape; gomme wo mongwe o a tla, go mo dira gore a dire se sengwe gape ka baka la gore ba dirile se.

¹⁴⁶ Modimo, a nke ba retologe ka thoko gomme ba tle Bophelong. A nke ba tsoge, gomme Barongwa ba Modimo ba tle tlase le dimpho tša Bophelo bjo Bosafelego, Morena, gomme ba ye go tloga phenyong go ya pele phenyong. E fe, Tate. Re retologela ka thoko, bošegong bjo, go tloga go dilo tša lefase le matshwenyego a lefase, re seboditšwe ke Modimo gore nako e batametše, Jesu o bowa morago lefaseng. Gomme a nke Moya wo Mokgethwa wo Mogolo o re fe, bošegong bjo, Bophelo bjola Bosafelego bjoo re bo lebeletšego. E fe, Morena. Re—re no rapela gore O tla fa ditšhegofatšo tše go rena ge re di kgopela Leineng la Jesu Kriste.

Ka dihlogo tša rena di inamišitšwe:

¹⁴⁷ Banna ba bohlale botelele bja go feta ba tlie go seo... ba latetše Seetša sela go ya go...ba hweditše Seetša sa go Phethagala. Gomme a nke Seetša se sennyane, bošegong bjo, seo se go dirilego o bee seatla sa gago godimo, goba mohlomongwe ebile ga se wa...Se go rathile, eupša ga se nke ebile wa phagamiša seatla sa gago, a nke Seetša sela se go hlahlele thwi go Seetša sela sa go Phethagala.

A re nong go ema bohole, bakeng sa tirelo ye nnyane ya boikgafo.

¹⁴⁸ A re direng pelo ya rena ye nnyane fa, bošegong bjo, lefelo la bodulo bakeng sa Kriste. Elelwang, bošegong bjo, kanegelo ya ka yalearogi ya modulatseleng. Bošegong bjo, ka kgonthe, Jesu Kriste ke modulatseleng yola mo mokgotheng. Yeo ke nnete, O—O be a le modulatseleng mo mokgotheng. Oo, ya, re re, “Re a Mo hlankela.” Kgonthe. Magadigadi ohle le matsaka, yoo ga se Yena. Yoo ga se Yena. O ile a swanelwa ke go hwa go le tlišetša Mpho ye, e sego mpopiania, eupša Bophelo. O ile a swanelwa ke go hwa gore a e dire, go tla go lena, tsela e nnoši ye A bego a ka kgona go fihla go lena. O be a ka se kgone go no tla mo le go ba Monna wa go phethagala, boka A bile, le go tla go lena. O be a ka se kgone go e dira ka tsela yeo. O ile a swanelwa ke go hwa gore a e dire, go tliša—go tliša Mpho ya Modimo go lena. Boka mo—mo modulatseleng a swanetše go hwa go iša mpopiania go mosetsana wa gagwe, Kriste o ile a swanelia go hwa go tliša Modimo go lena. Re nyaka go E amogela bošegong bjo. Gomme

ke a dumela, ka dihlogo tša rena di inamišitšwe, . . . gomme a re nong go phagamišetša diatla tša rena go Modimo le go gafela maphelo a rena ka boswa, thwi mo bošegong bjo.

¹⁴⁹ O Modimo wa Mogau, re—re nyaka Mpho ya Gago. Ke—ke mo, bjalo ka sehla se sa Krisemose, Morena, bjalo ka ge ke lemoga le go lebelela godimo ga lefase le go bona magadigadi le matsaka a letšati, Ke—ke kgona go no bona . . . ntle mošola, bjalo ka ge Beibebe e boletše, lebaka le la Laodikia, O ka ntle ga kereke ya Gago. O gannwe, moneneri go kereke ya Gago Mong le go batho ba Gago Mong. O—O—O gannwe. Mo—mo moneneri go beng se sengwe seo se gannwego, gomme O gannwe ka kerekeng ya Gago Mong. O gannwe magareng ga batho ba Gago. Ga ba Go nyake, Morena, gomme ba Go tlogetše, boka modulatseleng, mo mokgotheng. Modimo, O—O—O ile pele, wa hwa go le bjalo, gore O ke o tlise Mpho ya Modimo go rena. Gomme ka boikokobetšo re a E amogela, Morena. Ke a rapela gore O tla no tlatša dipelo tša rena le maphelo. Gomme re retologele ka thoko, go tloga bošegong bjo go ya pele, gomme a nke re be ba Gago ka moka ge re ikgafela ka borena go Wena.

¹⁵⁰ Nkamogege, Morena. Tše dintši ke diphoso tša bophelo tšeou ke di dirilego. Gomme, morategi Modimo, ge—ge ke—ge ke eme mo godimo ga lefelo le lekgethwa moo Ebangedi e rerilwego le moo re Go bonego fa, ebile ka go se—se Seetša se segolo seo se phadimilego godimo ga bona. Gomme re thabetše se kudu, Morena. Ke—ke ikgafela ka bonna go Krisemose ye, e sego ka go . . . gomme bjalo ka ge lefase le tla dira goba go—goba go phetla matlakala a maswa. Morena, ke—ke no nyaka go amogela Morwa wa Gago. Ke—ke nyaka go amogela Mpho ya Gago, Morena.

¹⁵¹ Ke nyaka go amogela Mpho ya Bophelo bjo Bosafelego ka Kriste. Gomme nna, ka therešo, Morena, ke amogela Mpho ya Kriste go nna, go leka go thopela ba bangwe go Wena. Modimo, rena yo mongwe le yo mongwe . . .

¹⁵² Dira mosadigae yo monnyane bose le go kokobela kudu, gore o tla kgona go etella ba bangwe pele go ya go Wena. Mpho ye O mo fago yona, bosadi bjo bonnyane bjola bja sehumagadi, a nke a be sehumagadi kudu go fihla baagišani ba tla mmona gomme—gomme ba nyaka go swana le yena.

¹⁵³ Dira monna, mošomalebenkeleng, e ka ba mang a lego, Morena; mo dire bophelo bja go kokobela, boka Kriste, gore ba bangwe ba ke ba bona. Ga re tsebe moo batho bale ba emego ntle fale, Tate, eupša ga re tsoge ra nyaka go tlogela ye botse, tselalephefo ya kgale; eupša re tla ithekga ka samorago, ra ithekga go ya pele, ra obeletša tsela ntle e ka ba kae go hwetša soulo. Bea yeo ka go phihlelelo ya rena, Morena, re a rapela. Gomme re fe bo—bo—bo bophelo bjo bo ka dirago batho go nyaka

go phela ka mokgwa woo, ge re ikgafela ka borena go Wena, bošegong bjo. Leineng la Jesu Kriste. Amene.

Bjale, ge le ka inamiša dihlogo tša lena gape, ke nyaka go lakaletša yo mongwe le yo mongwe wa lena yona Krisemose ya lethabo:

¹⁵⁴ A nke Mpho ye kgolo ya Krisemose, Yena wa pele gomme a nnoši le wa setlogo le Yena a nnoši a lego gona, Jesu Kriste, a ba ka boswa ka pelong ya gago bošegong bjo. A nke Moya wo Mokgethwa o tle go wena le go go tlisetša dimpho tša bodiredi le dilo go tšwa go Modimo, gore le... mpho yeo le ka go phela bophelo bjo bokaonana. Seo ke se ke se nyakago. Bokaone ke be le Bophelo bja Kriste ka go nna go phela bose le mofenyi go feta ge nka dira dimpho tšohle tša phodišo, dimpho tša diprofeto, tšona tšohle dimpho tše dingwe; e no mpho Jesu. A nke ke phele Bophelo, Bophelo ke bjo ke nyakago go bo phela. Ke nyaka go phela gore ba bangwe ba tsebe. Yeo ke ya ka—yeo ke tlhologelo ya ka ka Krisemose, gomme ke a rapela yeo ke tlhologelo ya gago. Gomme ke a rapela gore Modimo o tla re fa tlhologelo ya Gagwe.

¹⁵⁵ Bjale, a re beng le lentšu go tšwa go modiša, le la go phatlalatša. Gomme Modimo a le šegofatše. Re tla le bona Laboraro bošego. Go fihla nako yeo, Modimo a le šegofatše. 

*DIMPHO TŠA MODIMO KA MEHLA
DI HWETŠA MAFELO A TŠONA NST63-1222
(God's Gifts Always Find Their Places)*

Molaetša wo ka Ngwanešu William Marrion Branham, setlogong o abilwe ka Seisimane ka Lamorena mantšiboa, Desemere 22, 1963, ka Tabarenekeleng ya Branham ka Jeffersonville, Indiana, U.S.A., o tšerwe go tšwa go theipi ya go gatišwa ya makenete gomme o ngwadilwe ntle le go fokotšwa ka Seisimane. Ye ya North Sotho phetolelo e ngwadilwe gomme ya phatlalatšwa ke Voice Of God Recordings.

NORTH SOTHO

©2022 VGR, ALL RIGHTS RESERVED

VOICE OF GOD RECORDINGS, SOUTH AFRICA OFFICE
58 DISA ROAD, ADMIRAL'S PARK, GORDON'S BAY 7140 WESTERN CAPE
REPUBLIC OF SOUTH AFRICA

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Tsebišo ka tokelo-kgatišo

Ditokelo ka moka di bolokilwe. Puku ye e ka ngwalollwa godimo ga sengwalolli sa ka gae go šomišwa ke mong goba go fiwa ntle, mahala ntle le tefo, bjalo ka sedirišwa go gaša Ebangedi ya Jesu Kriſte. Puku ye e ka se kgone go rekišwa, go tſweletšwa gape ka bopepetla, go romelwa go website, go bolokwa go sedirišwa sa go bušetša, go hlathollelwa malemeng a mangwe, goba go šomišetšwa go kgopela ditſhelete ntle le tumelelo ya go ngwalwa ya Voice Of God Recordings®.

Tshedimošo ye e Tseneletšeng goba materiale yo mongwe o leng gona, ka kgopelo ikopanye le:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org